

東
華
續
錄

東華續錄

同治十七

臣王先謙敬編

臣張式恭恭校

十二月戊寅朔諭內閣前因軍興以來百姓慘遭荼毒命將出師
戡除暴亂並屢諭各路統兵大臣脅從罔治其有被賊偏受僞職
驅撓鋒鏑者殊可矜憫儻能率眾投誠卽准其自新嗣據各路軍
營奏到由賊中自拔來歸者朝廷無不寬其既往量予安插其或
臨時獻城及投誠後殺賊立功者亦無不立沛恩施卽如洪容海
等之久在賊中一旦率眾獻城卽赦罪錄功加以懋賞是朝廷之
恩義昭著雖吾民之被陷賊中者亦應共見共聞然猶恐將士等
不能仰體朝廷好生之德於窮蹙來歸之降眾仍不免有誅戮情
事見在會國藩李鴻章左宗棠督率大兵分剿江浙逆匪軍威大

振賊眾聞風驚慄而金陵逆匪勢尤窮蹙指日官軍四面合圍堅城不難立下惟念吾民陷於水火爲賊驅迫並非甘心樂從不能立即自拔者尙恐不少著會國藩等再行出示曉諭如金陵城中有被偪蓄髮隨同抗拒官軍果能於城池未下之先誠心歸順者勿論其從賊之久暫均一律准其投誠將軍械馬匹呈繳後該大臣等酌畱所部令其隨同勦賊一如洪容海等之例儻有不願隨營者卽飭地方官遞送回籍或妥爲安插毋令失所攜帶貲財不准兵勇搶奪如兵勇利其財物私行殺害卽按軍法從事本管官不行查辦一經發覺卽著該大臣等從嚴參辦其餘江浙蘇杭等處城鄉市鎮儻有殺賊反正或薙髮來歸者卽著照此一體辦理毋得追咎既往任意殺害以阻其向化之忱經此次再行剴諭之後凡被脅難民急宜及早悔悟自覓生機毋得俟城池攻克致令

玉石俱焚後悔莫及曾國藩李鴻章左宗棠其各將此旨刊刻謄黃徧行曉諭俾知覆幬生成咸與維新至意○僧格林沁國瑞奏自蔣集收復後其南韓樓賊寨係逆首張落刑族黨在彼占踞有糾眾來援之信十一月十五日探得張落刑糾約孫醜兒葛大牛姜台凌王懷義楊二各股馬步悍賊二三萬人麇聚渦河迤北王雙樓靈奶奶廟一帶盤踞十數寨臣等於十六日督帶馬隊前往至後夏張橋地方該寨捻首楊魁汰率黨出寨抗拒經官軍合力衝壓該逆始行遁回復派翼長舒通額等帶隊向東南探蹤進剿至雙樓賊寨捻首葛樹齊卽葛大牛率領馬步賊匪二千餘名前來迎拒經舒通額等揮軍衝擊賊隊截爲兩段一向南奔一向該寨敗走舒通額等向南追剿翼長蘇克金等將奔寨之賊逼至濠邊擊斃淹斃者四五百名其南遁之賊經舒通額追殺數里斃賊

數百名復探得張落刑黨與踞五加河北之小王樓臣等於十九

日正督攻小王樓間韓樓賊匪出圩列仗來援經托倫布等迎勦

將賊擊回二十三日孫醜兒竄至耿黃等寨內臣等督隊往攻用

炸礮轟擊斃賊甚眾並將該寨房屋燒毀多間該逆率黨南遁旋

有姜台凌領眾前來仍派翼長舒通額等帶領各起馬隊前往攻

勦賊眾列仗以待舒通額等率隊衝壓賊勢不支卽向圩中奔潰

我軍緊躡其後賊眾擁至寨門橋板墮陷賊無進路又復回撲我

軍奮勇爭先斃賊殆盡南北門復擁出步賊數百名當派蘇克金

托倫布等帶各營分投勦擊殲斃多名該逆退守圩內臣等當將

馬步兵勇撤下仍用炸礮攻擊復將房屋然燒大半該圩踞匪向

東南逃竄至捻首李城率黨東竄經營總富和於十八日追至睢

甯縣東南棗溝集寨地方李城等率馬步賊隊數千回拒富和會

合克蒙額馬隊姚廣武等馬勇分三路往剿斃賊多名該逆潰散我軍追殺復斃賊二千餘名其餘馬步賊匪千餘名向北奔逃該營總等見仍盡力追剿以期悉殲醜類上諭議政王軍機大臣等捻首李城本有赴東找尋王廣繼之說此次由江南邳境下游潛渡運河竄至蘭山縣屬之洪山等處游弋雖敗殘餘匪人數無多而蘭費一帶伏莽甚眾萬一與各匪勾結聯絡一氣其勢必將復熾僧格林沁已派富和春壽等帶兵追擊卽著嚴催該員等迅速赴東會合東省官軍實力截殺並著譚廷襄飭令都司楊通濂馳赴費縣一帶會剿吳棠所派之黃國瑞一軍計可到沂卽著飭令會合該兵團將此股敗匪一鼓殲除庶免燎原之患至棍教各匪並未大受懲創著僧格林沁嚴飭德楞額督兵迅剿不得再有貽誤致干重咎譚廷襄仍就見有兵力認真防剿毋令延蔓守備

桂錫楨從前曾經投賊聞其人甚不安分帶隊恐難得力著僧格
林沁飭令春壽嚴加鈐束毋令滋事將此由六百里各諭令知之
○僧格林沁奏欽奉諭旨以苗黨擄殺湘勇令臣與會國藩妥籌
辦理查臣營距苗沛霖處甚遠中隔捻巢往來必須繞道苗練擄
殺湘勇之事若由臣查訊恐辦理需時業經咨會會國藩轉飭蔣
凝學及地方官就近查詢苗沛霖令其將滋事之人交出秉公究
辦臣復函商會國藩此案兇犯若令苗沛霖查拏交出諒非難事
但從此淮北之練又歸其所屬恐苗沛霖嗣後藉此號召練眾更
屬有名不若仍由地方官查拏懲辦如苗沛霖攔阻把持再與理
論庶於懲辦兇犯之中仍寓不假事權之意臣遵旨駕馭苗沛霖
實出於萬不得已緣粵匪未除捻匪未滅伏莽乘閒肆起軍情賊
勢已有防剿不遑之勢若再添一練匪各路兵力實有未逮疊據

該練具稟剖辯實無叛意傾心來歸臣非不知其狡猾性成第因南畏楚軍北懾馬隊窮蹙而來是以將計就計札令勦擒立功發給銀兩以收練眾之心且可穩固苗沛霖不生西行赴陝之意苗沛霖屢次來稟每有怨尤楚軍之詞臣概置不答惟以理化導而已臣所以多方駕馭者恐激成事端轉煩兵力當此時艱添兵增餉誠非易舉不得不暫事羈縻並非折楚軍之威而縱苗練之欲此時兵力餉源若可勦除苗練不妨聲罪致討除一後患使懾以兵威苗沛霖從此斂迹較之駕馭籠絡更覺結實惟兵力足則以威制之兵力不足則以權術制之務須豫爲密定一策庶免勦撫兩難臣詳閱曾國藩原奏有欲撤壽州正陽之兵以遂苗黨之私以成臣急欲滅擒之志等語急欲滅擒誠臣素志至於專賴苗練實未計及於此今曾國藩遽議抽撤楚軍未免墮其計中似於防

守鈴束均有窒礙臣與曾國藩心無芥蒂自應和衷商辦俾得早
滅賊氛肅清疆圉曾國藩因軍情緊急已將將凝學一軍先行撤
回而臣營兵力本非有餘壽州等處實不可無兵防守應請旨飭
下唐訓方酌量派兵駐守以昭慎重 上諭僧格林沁奏駕馭苗
練情形其於籠絡之處煞費苦心卽勦捻給餉亦屬權宜之舉與
曾國藩李續宜辦理此事本意均相符合並無歧異諒曾國藩聞
之亦必深然其說彼此和衷商辦共濟時艱苗練之難制當無足
慮惟據僧格林沁奏苗練勢甚窮蹙是以設計略予和解並非抑
楚軍之威而縱苗練之欲是所恃全在壽州正陽等處楚軍之威
藉以防守鈴束使其有所畏懼今曾國藩驟將將凝學等軍撤回
壽州一帶空虛苗練一無所畏僧格林沁駐紮處所相距甚遠鞭
長莫及萬一從而生心乘機思逞壽城復被占踞則收復又重煩

兵力僧格林沁督軍深入捻巢正當喫緊斷難兼顧壽州著曾國藩唐訓方迅卽調派得力將弁酌帶兵勇馳赴壽州正陽關駐紮俾苗練有所鈐束不致別生事端將此由六百里諭令知之○廣安徽鄉試中額二名祁門縣學額七名婺源五名績溪太平各三名青陽建德各二名石埭一名○己卯諭議政王軍機大臣等昨據僧格林沁奏直東防剿緊要等語莘冠降眾張錫珠等在直東交界滋擾亟須趕緊撲滅以靖畿疆已派前鋒統領熙拉布統帶京兵三千馳往援剿惟吉林黑龍江馬隊存營無多據景綸特普欽奏遵撥陝西軍營官兵一摺內稱酌派布特哈官兵二百五十六員名由法庫邊門入關赴陝當卽諭令成保派員迎催改赴畿南一帶剿賊並令成保先行進京會同熙拉布統帶京兵前往俟抵畿南軍營統歸該員管帶以資攻剿見在濮州賊勢若何毛得

平會否他竄張錫珠竄擾南宮縣境官兵會否獲勝僧格林沁軍營距直東尙不甚遠偵探較確著隨時據實具奏以慰廩念將此由六百里諭令知之○庚辰諭議政王軍機大臣等遮克敦布奏勦辦北路賊匪連獲勝仗一摺張錫珠股匪由新河縣之丁家莊竄至南宮縣之尋寨旋竄至邱縣所屬賀釗地方均經飛飭各屬文武督團截勦疊有斬擒賊之馬隊數已不滿千人步隊殲除殆盡等語此股賊匪雖經官軍分路勦殺惟匪首尙未弋獲難保不逃至他處再行褻脅前諭文煜親行出省督勦此時亟應趕到遮克敦布於此股降眾變亂既未能覺察防範於先此次所奏如果確實該督及該副都統自可乘此會同實力趕辦迅速勦滅以爲補救畿輔地方密邇賊眾變生旬日所關非細如敢仍前玩泄或心存諱飾虛詞捏報希圖追責試問日後賊股南北紛竄自問當

得何罪已革參將王恩第既有通賊各情著解交孫治嚴訊究辦
另片奏濮州降匪毛得平等悉數殲除州城收復等情究竟有無
捏飾並著文煜迅速查奏將此由六百里各諭令知之尋奏遵查
股匪毛得平業已殄滅情形確實報聞○諭袁甲三奏苗練終難
就撫不可再令占據全淮上游形勢一摺據稱壽州城堅池深山
環水阻實爲異常險要之區苗沛霖本圖踞爲巢穴嗣因廬州克
復僧格林沁連破捻巢惟恐三路合攻萬難支持是以退出壽州
正陽關爲乞撫緩兵之計蔣凝學馳入壽州苗沛霖深悔失計一
旦撤退盡棄前功請飭僧格林沁會國藩會同妥議必不可使逆
練仍據壽州正陽等語袁甲三在皖年久於該處情形熟悉所籌
深合機宜著會國藩唐訓方仍遵前旨派兵駐紮壽正二處與蔣
凝學之軍互相聯絡僧格林沁仍當與會國藩會同妥商撥兵兼

願以期萬全無弊原摺著鈔給僧格林沁會國藩唐訓方閱看另片奏南捻李城等裝旗出竄欲與東匪合股但能嚴防清淮以保裏下河完善之區力扼運河以斷東省句連之路賊窮回竄則宿州湖溝之軍斷其歸路可以一鼓殲除等語此股捻匪竄入東境經僧格林沁派富和等追擊昨經諭令催兵前進著仍遵前旨嚴催趕緊合擊如被擊回竄卽著吳棠等飭宿州湖溝之軍斷其回巢之路就地剿除以清積年巨患裏下河一帶並著都興阿富明阿吳棠督飭地方嚴行防範毋任擾害原片著鈔給僧格林沁都興阿富明阿吳棠閱看將此由六百里各諭令知之○予山東陣亡主簿王啟英祭葬世職○辛巳李鴻章奏查前次四江口大捷擒斬甚眾賊膽已寒若有數路之兵乘勢進擣崑太或可漸次得手無如臣軍分守浦東西各城不能併歸一處前敵兵力本單苦

戰十餘晝夜疲乏損傷無隊可換必須略予休息蘇常附近州縣賊皆堅守崑山太倉相爲犄角尤爲蘇州門戶賊所必爭必救之地若我以孤軍深入而賊以四面來鈔堅城阻於前糧路斷於後此危道也臣之愚計欲俟上游諸軍攻勦得手使該逆奔救不遑然後乘其敝而蹙之以收前後夾擊之勢探聞金陵解圍後忠逆李秀城分股回蘇添守崑太布置極嚴其大股仍回竄甯郡和含專走皖南北空虛之地以牽掣上游兵勢臣見有兵數能進一面而不足防數面之鈔襲能當前路而無以備後路之接應將舍太而圖崑賊可繞嘉定以竄入將舍崑而圖太賊可繞青浦以竄入左右籌思不敢輕進貽誤惟有督率將士嚴申戒備俟有可乘之機卽行奮迅進取至前奏改造小划已由曾國藩委派處州鎮總兵李朝斌製造太湖水師臣與黃翼升復派將弁赴上游添造船

隻日下正在興工須明年二三月開配齊弁勇下駛黃翼升所部
師船見分扼青崑蘇嘉各交界亦待船勇到齊水陸合力節節進
剿 上諭議政王軍機大臣等李鴻章奏縷陳近日軍情一摺自
係實在情形著卽督飭將弁訓練兵丁如上游諸軍攻剿得手該
逆疲於奔命卽當相機疾進以成破竹之勢該撫務卽隨時斟酌
辦理不爲遙制另片奏派常勝軍助剿金陵白齊文不遵調遣將
楊坊毆打吐血並將豫備發餉之洋銀四萬餘元搶去經該撫會
商英國提督士迪佛立領事官麥華陀將白齊文卽日解去兵柄
聽候中國查辦並派李恆嵩會同英國教練官奧倫暫行接管仍
聽李鴻章調遣其支發口糧約束營規裁減勇數一切章程均由
中國主持該兵官不得干豫並請將白齊文吳煦楊坊分別懲處
所籌均尙妥協白齊文毆傷監司大員劫奪餉銀數逾巨萬實屬

不法已極該員已隸中國版圖自應遵中國法律治罪著革去三品頂帶交李鴻章嚴拏定擬具奏吳煦楊坊有督帶之責辦理不善均著暫行革職仍令安籌接辦以觀後效至常勝軍助攻九洲疊經催令趕緊籌辦今主將新易約束無資是否仍令入江助剿抑或暫行畱滬另調一軍助攻九洲之處著曾國藩都興阿富明阿李鴻章會商妥辦至由江浦竄出之賊連陷巢含等縣逼近廬州其紛竄皖南之賊已擾及祁門前經唐訓方曾國藩等先後奏到大概情形尙有布置連日曾否得有勝仗賊蹤能否不至蔓延殊深廕念著曾國藩都興阿富明阿將詳細情形迅速具奏將此由六百里各諭令知之○諭多隆阿奏遵將勝保拏問查鈔及破賊連營等情形覽奏均悉多隆阿於勝保所部帶兵各官先爲開導各營兵勇加意拊循無不帖然畏服所鈔勝保畱陝貲財

分給勝保欠扣銀糧兵勇辦理亦皆允當多隆阿於勝保起解後
卽能督軍出擣賊營破賊連營八座同圍已鬆卽可進攻王閣村
羌白鎮等賊之老巢著卽乘此新銳相機進取見在直東有降眾
竄擾勝保部下降眾不可散遣致令偷竄句合卽逆回詭詐百出
亦應於勇往之中寓慎重之道老謀必勝以圖萬全是爲至要前
據恩麟奏甘肅附近陝省各州縣均有回匪煽惑句結亟須馬德
昭前往勦辦嗣據瑛榮奏訊取逆回供詞有糾約各路回匪圖攻
西安省城之說情形甚爲喫緊應否派員撥兵前往省城守禦抑
或卽令穆騰阿前往及馬德昭能否派往甘肅之處均著多隆阿
酌量辦理仍迅速具奏將此由六百里諭令知之○諭劉長佑奏
攻克貴縣荔浦各賊巢並俟楚軍換調赴粵會剿一摺貴縣荔浦
地方餘匪尙多首逆未擒蓮塘股匪亦未大受懲創劉長佑已將

關防交付張凱嵩著該撫卽督飭在事文武及地方鄉團實力勦辦江忠義一軍前經毛鴻賓奏畱粵西嗣因金陵賊匪渡江北竄廬郡空虛復諭令曾國藩毛鴻賓知會該提督督帶所部馳赴皖北該提督起程後所餘蓮塘兵勇卽著毛鴻賓派員接帶仍添撥兵勇前往以期厚集兵力及早蕨事皖北軍情萬分緊急毛鴻賓當懍遵前旨迅催江忠義卽日起程不准稍延時日致誤大局將此由六百里各諭令知之○以同州等處勦賊功復已革提督趙旣發職○予江蘇陣亡副將蔡東祥廣西陣亡在籍知州蔣上治等祭葬世職○免塔爾巴哈台厄魯特應賠牲畜並予蒙古貧民銀○壬午諭議政王軍機大臣等張之萬奏遵旨將吳正誼等押赴僧格林沁軍營並歷陳苗練情形一摺吳正誼李德英等均在勝保軍營歷經保舉獎勵且札赴潁亳壽州一帶募勇難保不與

苗練爲影射業經押赴僧格林沁軍營卽著該大臣察看情形妥爲安置張之萬所奏馭苗之法湘軍不宜操之太蹙北兵亦不宜信之過堅與該大臣前奏隱相符合其所稱潁壽東西兩團東團爲苗沛霖所部西團歸吳正誼等管轄西團本非苗黨若僧格林沁曲加籠絡俾移其畏苗之心堅其爲國之志並嚴諭苗沛霖如於各團中私自弄兵尋仇者卽是與官爲仇移兵討之其勢旣孤其技自窮各等語所籌亦不爲無見並著該大臣妥籌辦理張之萬摺著鈔給閱看將此由六百里諭令知之○諭張之萬奏臨漳內黃境內土匪蜂起派兵剿捕一摺河朔爲豫省完善之區地方最關緊要見值東省降眾復叛冠萃一帶寇蹤充斥與臨內各境壤地毗連萬一互相勾結其勢恐成燎原張之萬見已派李世玉楊長春等督兵馳往剿辦該二員向來打仗均稱勇往此次進剿

初起匪徒必易藏事卽著該署撫嚴催李世玉等迅速起程馳赴臨漳等處務將各股土匪悉數殲除不准稍有遲延致成滋蔓河北道周煦徵有統轄地方之責並著責成該道督率兵團實力防剿毋得稍事玩忽自干罪戾河北鎮牛浩然帶兵能否得力並著張之萬查明具奏河朔臨內各境與大名廣平二郡犬牙相錯見在張錫珠等被擊南竄難保不與豫匪勾通爲患著文煜妥籌防剿毋得稍有疏虞遮克敦布辦理直東防務業經貽誤於前此時務當激發天良認真剿賊儻敢仍前玩泄任令直豫各匪聯爲一氣惟該副都統是問張之萬另片奏收撫熊藍二寨明港驛路當可疏通等語卽著飭令在事員弁相機剿撫並飭李續燾派兵會剿邢集以靖南圍至收撫各寨如果係地方官紳等實力剿辦使該匪等畏威向化永無反側出力人員該署撫爲之破格請獎儻

係粉飾邀功旋降旋叛亦當查明貽誤各員嚴參治罪不准稍有回護將此由六百里各諭令知之○命荊州副都統薩薩布赴直隸山東剿賊○癸未諭內閣前因知府曾貞幹擊退援賊後降旨詢問該知府紮營何處茲據曾國藩覆奏該知府自五月馳赴江甯大營秋閒遘病適值援賊大至力疾督戰解圍後積勞身故等語曾貞幹自赴江南軍營屢著戰功朝廷早欲擢用因曾國藩再三懇辭擬俟江甯克復後從優獎勵茲以力疾督戰積勞病故悼惜殊深雖未經曾國藩奏請給卹而曾貞幹係效力疆場戰功卓著之員著卽追贈按察使卽照按察使軍營立功後病故例議卹以示優異○諭前因袁甲三奏參已革運使金安清等承辦捐局諸多含混當經諭令曾國藩秉公查辦茲據奏稱委員詢取各供分別擬結等語此案金安清承辦江浙皖捐局收解尙屬相符所

失印照實收均經咨部杭卡續收等捐均在已解數內程愷亭捐多繳少或亦事所恆有至原參該革員在上海等處販運絲茶據奏訪查尙無其事籌餉局經手各款逐查簿據亦無侵吞重情惟吳丙齋等捐款該革員均化兩款爲一款實屬有意含混且於經手銀錢濫支濫應物議沸騰咎無可辭業經革職著毋庸議惟應賠繳局用銀一萬六千八百餘兩錢二萬二千串零未便懸宕該革員泰州等處貲財業經查封除貲財備抵外並將鈔出物件交江北糧臺變價備抵其餘所短數目仍勒令分限解交吳棠唐訓方軍營充餉至汪曜奎經辦蘇捐監照餉票等項如數助繳與金安清雖無交涉事件惟見於查辦勝保案內有牽涉事件礙難照請開復仍著會國藩迅飭該員前赴多隆阿軍營聽候查辦○會國藩奏十月初八九等日賊酋賴汶鴻古澂賢等自廣德甯國縣

竄入旌德之六都距城僅八九里守城總兵朱品隆帶勇禦賊於楊村一戰卻之十二日賊分三股攻撲東南北三城並西門外胡暉堂營壘直薄濠邊胡暉堂督飭士卒憑營穩擊朱品隆率兩哨及朱步青所帶隊伍衝出西門入營助守殲賊無算賊乃愈攻愈猛朱品隆令胡暉堂悉力守禦仍自出營突陣賊始返奔其攻城之賊亦退至數里外下寨十五日朱品隆派隊出城鏖戰兩時破賊三壘十七日賊復大舉攻城我軍礮石外擊傷賊頗多十八日賊攜長梯攜牌將欲甘心一逞朱品隆令洪德發帶隊由東門過橋牽制東路之賊令易潤壇朱品隆朱步青出西門排列城下仍親率老營部卒向大北門往來督陣賊見我軍整隊齊出悉銳來犯朱品隆以火箭環射焚賊攜牌易潤壇等在西門搏戰方酣忽見胡暉堂營中火光突起恐有挫失奮力一衝截賊數段胡暉堂

乘勢出壘猛擊羣賊一聞散走東門南門等股經洪德發等縱橫
盪擊亦卽紛紛駭潰次日朱品隆復督諸將分投出擊擒斬極多
毀平二十餘壘賊向楊村遁至九十等都旌德遂於十九日解圍
方旌德之被圍也臣調易開俊三營吳廷華二營由甯郡往援十
一月初三日馳抵涇縣適吳廷華二營先一日入城正在料理赴
旌旋報甯邑賊黨由曹溪竄聚壩頭分路環攻涇縣易開俊吳廷
華各率所部登陴守禦賊但聞涇縣守兵極單而不知援旌之軍
適集於此倉皇遽遁先是昌化踞賊巢逆陳逆等股率黨數萬於
十月二十四五等日陸續竄入績溪縣城並在孔靈分築卡壘意
在阻絕旌德糧路二十八日唐義訓率軍會合左宗棠派援之王
文瑞老湘七營馳紮臨溪途遇野掠零賊縱軍擊之小有斬獲十
一月初一日賊眾來犯唐義訓王文瑞分投進攻賊眾披靡不復

成伍連破村旁四壘並毀堅卡五重軍士入村勦捕誅夷羣賊唐義訓派強新一營與王文瑞會師於績溪城外里許時至夜分謀報城賊將遁唐義訓王文瑞令各營裹糧出隊賊方出城紛走我軍攻復城池一面躡賊尾追直至叢山關而還當唐義訓王文瑞進勦時旌德之賊已於初三日竄至太平初六日竄黟縣所屬之西遞地方初七日駐祁之良字兩營在黟境西武嶺迎戰挫衄賊已於初七日突陷祁門維時唐義訓甫自績溪回軍徽郡王文瑞回軍草市聞祁門之警星夜馳援業已無及初九日兩軍由漁亭進駐花橋將以次日會攻祁城賊不料大兵驟至闔城鼎沸遂謀宵遁我軍於初十日進復縣城僅斬尾隊百餘人而賊之前隊早出赤嶺遁竄石埭太平一路查賴古諸賊酋不得逞於旌涇績溪歙縣而繞越祁門蓄計至狡關繫至巨幸仗 聖主威福將士用

命屢卻兇燄再收名城除飭各營嚴行防禦外此次尤爲出力各員謹先行開列懇懇恩施總兵胡太旗參將劉永勝遊擊張和興擊賊陣亡深堪憫惻應請飭部從優議卹又奏南北兩岸軍情臣業已彙陳大概茲奉諭旨垂詢廬州守禦及蕭慶衍等進兵一節查渡江之賊前隊在巢縣屯眾擄糧其後隊於十一月初九日竄聚運漕鎮廬州城守之兵前有石清吉四營又截畱唐訓方所部義字三營足敷守禦臣所調蕭慶衍八營十四日已到舒城毛有銘七營二十日續到舒城進兵之路若走巢湖之北由柘皋以至巢縣則係用眾之地軍無後繼轉運維艱若走巢湖之南由無爲以進運漕則係用寡之地得水師相輔而行較爲穩著該二軍已於二十二三等日由舒城拔赴無爲州擬攻運漕以截巢縣後路惟北路廬州柘皋一帶尙少一枝勁兵恐難得力前疏請調江忠

義一軍伏懇 鴻慈俞允庶皖北不至糜爛又奉諭旨飭令都興
阿派兵會剿並提督李世忠是否出力一節查都興阿揚州自派
撥楊心純一千八百人赴援雨花臺後兵力已薄且九洲洲北犯
之賊腐聚江浦浦口可以上竄和州巢含下竄揚州裏下河都興
阿自宜專保揚防不必兼顧上游且中隔浦六等城亦難出境會
剿此次賊竄北岸係忠酋帶至金陵新渡之賊非僅九洲洲舊踞
之賊一面圍撲李世忠營壘一面衝過該營繞越上犯聞該提督
部下亦嘗接戰多次屢有擒斬外間因賊所過城卡皆係李世忠
汛地往來自如有疑其部下不肯出力並有更甚其詞者 臣皆付
之不聞不問大抵因分汛太廣賊股太眾以致未能堵截該提督
疊次咨報力戰屢勝請獎請卹有案 臣當爲彙案陳奏又奉諭旨
垂詢濡須口梁山是否保全並水師駛入巢湖一節查裕溪口卽

古之濡須口近爲彭玉麟駐紮水師之地業經曾國荃抽撥周惠堂等兩營分守裕溪口及西梁山兩處水陸倚護尙可保全惟巢湖在巢縣之上水師又在運漕之下巢縣運漕兩處旣爲賊踞則三板飛划均不能由城中衝駛入湖又奉諭旨垂詢曾貞幹赴雨花臺後蕪湖防兵是否尙厚一節查臣弟曾貞幹自五月赴金陵大營秋閒遘病閱月稍愈本擬離營調養適值援賊大至力疾督戰四十六日解圍積勞病劇遽於十一月十八日在營身故皆由臣位高德薄咎積災生疫氣流於營中餘殃及於手足所部十營併隸曾國荃統轄尙慮力難兼任臣擬親赴金陵察看一次又以皖南北賊竄方張未敢輕離安慶致令人心搖動至蕪湖要地有周萬倬吳坤修等營守之金柱關有朱南桂羅逢元等營守之防兵尙厚仍時與楊岳斌水師截擊渡河之賊十一月初八十三十

七十八等日水陸俱獲小勝會國荃以沿江要隘恐有疏失又從金陵分長勝兩營赴龍山橋嘉字一營駐東梁山俾作蕪湖之聲援而固金陵之後路又奉諭旨查詢李秀城蹤迹及北竄賊目何人一節查偽忠王李秀城尙在金陵前次所稱遁回蘇城係屬諜報未確業經續奏聲明此股渡江賊目爲偽漳王偽對王及忠逆之子據李世忠報實有八九萬人見踞巢縣者爲偽對王洪春元祇有假冒官軍旗幟頂戴之事並無薙髮之說確由金陵竄出圖犯廬州安慶掣動南岸兵勢其九洑洲賊巢見仍堅踞如故該洲與金陵城一犖可杭朝夕往返不至因無援而先遁又奉諭旨飭令函催李續宜啟程東下一節臣近因事機不順日夜憂灼其望李續宜回營迫切之情百倍於他人惟見其病勢頗重到籍以後亦未痊愈欲借百日之假調養有用之身正月初二日假期已滿

見經兩次函催無論能否病痊屆期決當銷假東下兼程旋營力圖報稱 上諭議政王軍機大臣等曾國藩一門忠義不避艱險兄弟均在行閒爲國宣勞不料曾貞幹遽爾病故曷深悼惜績溪祁門雖已克復而石埭太平一路東西均虞竄越著曾國藩嚴飭朱品隆等分路剿擊肅清徽境庶已復各城不至再有他虞鮑超所募湘軍已否到營著於到營後飭令酌量情形妥籌戰守見在該營情形若何實深廬系如有攻剿情形著該大臣隨時具奏北岸官軍已由無爲進剿運漕鎮卽著飭令各將弁迅速攻克毋任遷延蕪湖等處防兵尙厚雨花臺後路可以無虞足慰懸系逆賊洪春元旣未薙髮何以有假冒官軍情事著該大臣查明辦理馮子材等奏剿辦丁村等處賊屯賊卡數十處悉行蹋毀直至句容縣境之上會村是軍情極爲得手該逆詭譎百出該提督等不可

因得有勝仗稍涉大意務當格外謹慎以免疏虞而副委任將此由六百里各諭令知之○吳棠奏據黃開榜稟稱任弗得任柱夏廣懋等大股捻匪二萬餘圍撲孫疇之長勝營勢甚岌岌經黃開榜督飭各軍合力剿擊賊見官軍守禦嚴整十一月十二日卽由宿州迤南向東路奔突黃開榜當以孫疇賊巢未下抽派副將姚廣武等統帶馬步隊二千跟蹤追剿十三日偪賊至宿州東南之大店地方襲殺落後零匪百餘名十四日至葛家店該逆馬步萬餘列仗抗拒姚廣武等分路進擊賊眾東遁官軍追殺十餘里斬賊百餘名十五日追賊至靈璧縣適親王僧格林沁所派副都統富和帶馬隊千名來會十七日追賊至泗州署安徽撫臣唐訓方所派帶兵官克蒙額一軍並來會剿兵力已厚當卽乘夜追擊十八日至睢甯縣境之棗溝地方克蒙額姚廣武富和等軍分路兜

擊賊猶屢退屢上廕戰兩時之久姚廣武突入賊陣受傷落馬富和克蒙額等隊併力衝上賊始不支棄械紛潰姚廣武復裹創督隊隨同追殺沿途斃賊無數救出難民千餘名敗匪仍向北路狂奔意圖乘間渡運十九日黎明有敗捻竄至宿遷南岸覓渡時署淮揚鎮總兵龔耀倫已令礮船分布河內遂帶兵三百名同守備王樹枏馬隊一百名乘霧渡至南岸痛擊斃賊甚眾敗捻西竄邳州鉅山該署總兵復派遊擊汪昇發等截殺二百餘名又疊經邳州戚家圩阜河圩埠子圩民練截殺二百餘名敗匪復竄至邳州之馬廠河口又經都司張垵帶礮船水勇登岸迎剿適富和等隊並臣派防河之參將吳鳳柱馬隊同時追至三面蹙擊斬匪甚多餘賊狂奔西遁邳宿雖境一律肅清惟據探報敗匪千餘於二十日由雙溝西竄二十一日折而北趨追兵不及有向東境臺莊以

上大泛口渡河之說臣前派總兵黃國瑞帶隊赴東剿辦棍匪理應移緩就急先將此股擒匪掃除淨盡見飭該總兵卽統所部隊伍剋日由邳州一帶北追探明賊蹤併力剿辦上諭逆擒李城等糾眾出竄經吳棠調撥兵勇會同僧格林沁唐訓方派出之富和克蒙額等軍合力追剿斬獲無算邳宿睢境一律肅清餘匪折向東境臺莊渡河據譚廷襄奏該股匪見在盤踞蘭山境內之成全山車轆一帶該處匪圩甚多若不迅圖撲滅勢必勾結各寨聯絡奔突剿辦更形棘手總兵黃國瑞帶隊赴東剿辦棍匪見據吳棠飛飭該總兵移緩就急著卽催令馳赴蘭境會同春壽等軍併力兜剿並著譚廷襄速飭管帶楚勇之員弁由平邑集相機進剿務將此股竄匪悉數殲除儻仍令該匪與棍教各匪聯成一片合夥東趨恐該前撫不能當此重咎也濮州首匪毛得平等雖經擒

獲正法所有餘匪仍恐按捕未盡且水套內匪首吳錫潰尙未緝獲卽著責成署總兵常存督同遊擊祿彰等酌畱兵勇以資防範仍著飭令該地方文武員弁趕緊按剔餘匪淨絕根株不准草率了事將此由六百里各諭令知之○鮑超丁母憂命改爲署理浙江提督仍畱營○允特普欽奏招墾黑龍江荒地○予江蘇陣亡遊擊桂林安徽陣亡總兵官胡太旂等祭葬世職○甲申諭議政王軍機大臣等毛昶熙奏克復正陽擒匪寨堡多座並確山項城官軍會剿獲勝一摺官軍進攻正陽賊巢連克黃寨陳寨收撫姚莊等寨確山知縣王觀瀛復帶練會克熊王寨將熊家圍藍店降眾收撫項城知縣恆倫復將傅寨攻克此時擒眾紛紛投誠辦理正在得手著毛昶熙乘此聲威會合各軍迅將稔惡各匪首盡數擒斬不可輕率收降致貽後患至陳大濤張瀛林均係倡亂逆首

斷難網開一面陳大濬見襲踞淮南之蕭王寨已由李續燾前往
攻剿仍著張之萬毛昶熙督飭該總兵迅速殲擒毋任竄逸並著
督飭趙鴻舉劉成忠等兵練民團速將張鳳林踞寨及陡溝各匪
巢悉行掃除陳大濬霍廣玉等擒首必應擒斬以申國法何必定
須張鳳林擒獻且張鳳林情罪重大毛昶熙之不准其投誠辦理
甚是毛昶熙務宜督飭諸軍一意攻剿不准因其有立功自贖之
語輕信緩攻重其狡謀至汝甯信陽光州所屬一帶賊寨尙有若
干座盤踞何處各寨賊數若干並已經攻克賊寨若干座就
撫民圩若干處及官軍民練駐紮營盤圍攻賊壘地名形勢兵練
數目均著張之萬毛昶熙迅速繪圖貼說馳奏將此由六百里各
諭令知之尋奏遵查桐柏至頂城共五百餘里茲將所有賊寨繪
圖貼說呈覽其已就撫之寨計汝陽六十七處正陽七十五處信

陽十三處新蔡五十二處確山項城各五處至匪蹤飄忽無常人
數難詳多寡我軍追剿靡定時或移動營盤未便列入圖中前後
致行錯迕報聞○申嚴武弁臨敵退縮處分○乙酉諭議政王軍
機大臣等前因張錫珠股匪滋擾南宮冀州等屬諭令文煜親行
出省督剿此時自已出省何以尙未奏到文煜前奏孫治業已帶
兵出省見在督兵何處著卽與遮克敦布探賊所向跟蹤追擊迅
將此股餘匪合力掃除毋得稍涉遷延貽誤致干罪戾賊旣竄往
館陶直隸所屬地方自已肅清所有前派熙拉布帶領之神機營
兵三千名已諭暫緩起程如果直隸境內確已肅清此兵卽可毋
庸調發或賊勢仍未少衰必須京兵前往之處均著文煜體察情
形迅速奏到再定京兵行止至遮克敦布旣已貽誤於前著卽督
飭各軍越境追剿會合東省官軍將張錫珠一股迅速撲滅文煜

仍一面督飭各軍力圖蕝事以靖地方將此由六百里諭令知之
○諭譚廷襄奏南捻圍撲費縣被擊竄赴東北一摺捻逆李城由
蘭山成全山單輜一帶攻撲費縣同石民團經官軍擊退又有匪
徒直撲縣城我軍登陴守禦斃匪百餘名該逆由費縣北竄李城
招集餘黨並勾結蘭嶧等匪合夥欲赴登萊青一路打糧譚廷襄
見催德楞額迅速追擊並飭沂縣文武一體協剿並據稱賊如向
東奔突卽飭見駐淄川之道員陳顯彝督帶兵團扼截一面咨登
州鎮總兵曾逢年帶官兵一千五百名迎剿賊如竄近北路卽抽
撥前敵各隊馳往堵遏所籌尙屬妥協著卽就見有兵力相機剿
辦迅掃逆氛登萊青地方尙多完善尤須加意嚴防毋令匪蹤闌
入德楞額一軍仍駐嶧縣並未星馳進剿實屬不知緩急著僧格
林沁譚廷襄飭令迅速帶兵前進僧格林沁派出之富和一軍卽

飭趕緊赴東協勦黃國瑞一軍業經行抵邳州並著吳棠飛催前進會同東省官軍併力兜勦儻富和黃國瑞等遷延觀望意存畛域卽著僧格林沁吳棠譚廷襄嚴參治罪毋稍姑容將此由六百里各諭令知之○左宗棠奏逆賊以金華爲老巢恃嚴州爲犄角嚴州地勢外通皖南徽甯兩郡內達杭州形勢尤重臣飭卽選道王文瑞知府魏喻義合圖嚴郡嗣因皖南之賊漸逼徽州不得已調王文瑞駐遂安一軍入婺援勦所恃以圖嚴州者僅魏喻義一軍二千人而又分駐嚴之銅關與壽昌縣城兩處兵力苦單臣飭臬司劉典一軍力攻蘭谿一路冀分嚴郡賊勢而陰飭魏喻義相機克復嚴州並搬駐壽昌之一千人併歸大隊以厚其力蓋踞嚴逆目譚富與踞蘭谿逆目譚星爲兄弟均是著名悍賊彼此互相首尾逆目李侍賢嗾其合勢以抵我軍者也故攻嚴郡則必先攻

蘭溪以分其勢魏喻義既駐軍銅關據險集團令其協力謀之逆目譚富於十一月初八九等日糾集桐廬浦江各逆疊次來犯均經我軍擊退城中被脅難民時訶賊動靜詣營密告魏喻義得以先事制之十一日譚賊傳僞令將於十三日傾巢來撲銅關營壘魏喻義聞之先於十二日率所部偃旗息鼓赴洋溪潛趨鐘嶺腳分路設伏布置甫定少頃先鋒悍賊五百餘名行過伏前伏軍驟起四面圍殺無一脫者後隊萬餘見前賊破殲驚竄回城魏喻義佯退洋溪以弛其備十三日晡閒魏喻義令諸營各舁攻具以備登城令所造礮艇直下南門大河斷其水道馬隊由北路繞過東門斷其下竄桐廬之路魏喻義親督兵於夜半時潛抵西北兩門豎立雲梯通判李昌彩等首先登城各勇一擁齊上殺斃巡夜守城之賊百餘正欲下攻城內悍賊分段擁上我軍奮威鏖戰殺賊

二千餘人下城巷戰至南門大街各營畢集斃賊不計其數餘賊數千望東南狂竄城門鍵閉牢固猝不及啟其偪由城垛躍下墜死者約百餘河下賊船經軍功李本鴻督帶礮船搶下蘭谿港口轟毀殆盡梟水各匪率皆淹斃越城脫者沿河旣被礮轟竄至東路又被守備林德元等率馬隊追斬千餘各路團丁畢集零匪無路可遁被偪仍回東門城下伏地投誠概令薙髮分別安撫遣散嚴州府城立即克復計共殺賊萬餘焚燒賊船二百餘隻至賊目譚富是否死於亂軍抑死於焚溺無從查確惟驗所獲畫龍大纛等件皆譚賊物也是役仰仗 皇上威福克復名城犁巢擣穴摧斬極多尤爲出力各員謹先行開列籲懇恩施其在事出力官紳兵勇可否由 臣覈明保獎以昭激勸又奏甯波各營會克上虞後新昌嵊縣之賊均竄諸暨其東陽義烏之賊均紛紛西竄據探

羣賊麀聚金華屯紮數十里意在援救湯溪龍游然徘徊不敢遽進龍湯兩城之賊揚言逆首李侍賢已至徽州令諸賊固守實則接濟已斷外援不來諸賊亦自相猜貳屢據賊中逃出賊目及搜獲僞文所言窮蹙情形相同其偶爾衝出零星小股均經各營隨時擊退每次擒斬數百名然城堅難攻未能遽下見在嚴郡既克金華右臂已斷如能速克蘭谿則嚴州之水運通金華孤而杭州亦震龍湯兩城之克亦當不遠臣惟有盡瘁圖之不敢稍有懈怠至臣軍所部二萬七千餘人見在餉銀僅敷發至本年四月欠發已近八箇月自夏徂秋爲疾疫所苦夫勇物故者至四千餘人之多入冬以來漸次痊可目下臣遣員回楚添募勇丁長夫又在溫台兩府挑選勇丁來營補充病弱空缺需餉日繁各省月餉均難如數解濟前奉恩諭垂詢及之臣已恭錄行知並傳各營官哨官

剴切宣示諸將士亦知感荷 皇仁雖缺餉七八箇月之久未忍
言去卽病弱稍能立起者亦未忍求假 臣嘉其誠而亦未嘗不憐
其苦也所有龍陽蘭谿戰事應俟續報以慰 慈廑 上諭嚴州
克復殺賊逾萬蘭谿賊膽已寒著卽迅催劉典一軍趁勢規復如
蘭谿可克則嚴州之水運亦通金華賊勢遂孤杭州亦將震動剿
辦更易得手龍游湯谿賊援已斷諸賊自相猜貳正可設計攻拔
各處剿辦情形並著隨時奏聞以紓南顧之憂該撫仍卽策力諸
軍奮勉圖功以期節節肅清同膺懋賞將此由六百里諭令知之
○諭左宗棠奏浙省軍情並餉項匱乏等語左宗棠之軍見已收
復嚴州進攻蘭谿龍游等城軍務正形得手而該撫所部二萬七
千餘人積欠口糧至八月之多且自夏徂秋軍中苦疫將士荷戈
枵腹猶復力疾衝鋒軫念行閒實深廑系見當攻城喫緊若令停

兵待餉貽誤何可勝言著晏端書沈葆楨迅將協濟該省餉銀源
源報解以濟飢軍毋得以無款可籌稍涉遲誤用副朝廷軫念戎
行之意將此由五百里各諭令知之○丙戌諭議政王軍機大臣
等前因東省降眾張錫珠等滋事擾及南宮一帶畿南防剿緊要
特命熙拉布統領京兵三千並令山海關副都統成保會同帶兵
前往助剿見在張錫珠股匪敗竄館陶等處直隸所屬地方已可
無虞是以將熙拉布所帶官兵諭令暫緩由京師起程再行聽候
調遣惟此股降眾並未大受懲創而豫省臨漳內黃等處土匪蜂
起與山東之冠莘兩縣直隸之大名廣平兩郡壤境毗連幾輔重
地不可無知兵大員統帶勁旅實力防剿成保曾隸僧格林沁營
中帶兵其人材具能否獨當一面畀以重任是否不至僨事著僧
格林沁迅速具奏將此由六百里諭令知之○諭多隆阿奏移營

進偏賊巢攻毀逆營獲勝各摺片多隆阿於攻克東西韓村八座
後卽督率諸軍痛加勦洗連克背坡等村莊三處見在同州城圍
已解糧道已通著卽直擣王閤村羌白鎮老巢以期節節掃蕩肅
清陝境此次摺內所敘皆係該大臣所部各軍勝保所帶之馬步
官兵及宋憬詩劉占考等降眾見在作何布置調遣之處尙未據
該大臣聲敘直東土匪如張錫珠等係該降眾等從前同類難保
不聞風思逞多隆阿不可遽行裁撤恐乘間東歸蔓延句結而畱
之肘腋尤須妥爲駕馭方無後患惟在該大臣隨時相機酌辦甘
省屬匪鴟張著熙麟探明道路稍通卽迅遵前旨馳赴新任馬德
昭宜帶兵隨該督前往爲是如果多隆阿所奏甘省回務已鬆之
語屬實方可令於穆騰阿抵西安後前往漢中是在該大臣權衡
緩急相機辦理潼關扼秦豫之衝最關緊要並著多隆阿選派得

力員弁前往馳紮俾熙麟得以刻日起程將此由六百里各諭令知之○命陝西提督雷正綰幫辦欽差大臣多隆阿軍務西安將軍穆騰阿會同巡撫瑛榮辦理省城防守事宜○予陝西陣亡參將徐明德祭葬世職建祠○丁亥諭內閣前因勝保被參貪污欺罔多款降旨革職等因查鈔京寓貲財並令多隆阿將勝保在陝西侵吞餉項及寄頓財物一併查鈔分賞軍士茲據多隆阿奏稱勝保貲財衣箱等件均在侍衛祥恩處寄頓當派協領同慶筆帖式安成前往密查被祥恩捆毆身受重傷等語勝保軍營財物寄頓祥恩寓所多隆阿遵派同慶等往查祥恩膽敢將該員等捆毆多傷實屬目無法紀祥恩著卽革職交多隆阿嚴行審辦將勝保在陝另寄他處貲財要件逐一根究不准有絲毫隱匿祥恩前在周口爲勝保護送女眷入陝其爲勝保信任之私人已無疑義且

據多隆阿訪查該革員平日無惡不作所有祥恩京寓貲財著派步軍統領存誠總兵熙拉布前往查鈔○諭議政王軍機大臣等近因封疆藩臬在在需人屢諭會國藩等臚舉人材以備任使見在皖省司道如江忠溶馬新貽蔣凝學葉兆蘭均閱歷戎行其材器如何該大臣知之有素卽著詳細奏聞此外有職分較卑而器識甚遠將來堪以登用者並著一併具奏從前楚省人材極盛諒該省仍不乏人左宗棠李續宜均知以得人爲急務該大臣生同里開著卽函商加意延訪隨時奏聞用備他日任使將此由六百里諭令知之○僧格林沁國瑞奏降眾張錫珠等滋事臣等因督軍進擣皖捻實無兵力可分並無派馬隊一千五百名由威縣追剿之事誠如 聖諭恐該匪假冒官軍馬隊圖逞狡謀當卽飛咨直隸督臣文煜等一體嚴防至臣等督軍進擣皖捻老巢該逆張

落刑糾合各股捻首意在攻撲我營自我軍屢次擊敗該逆無隙可乘十一月二十五日後俱已撤回渦河南岸各歸老巢臣等仍擬攻剿渦河迤北賊圩次第掃蕩十二月初五日帶隊進攻韓樓用炸礮然燒該圩房屋甚多臣等惟有竭力圖維以期迅殄醜類見探該逆張落刑等或欲竄向東北與李城合夥或往汝甯一帶與陳大濬合夥南竄該逆並在雉河集迤東十餘里尹家溝地方挑挖長濠以阻礮車臣等已咨行河南撫臣張之萬侍郎毛昶熙署安徽撫臣唐訓方督飭官軍嚴密防範惟前因捻首李城率眾東竄派營總富和帶領馬隊跟蹤追剿嗣經該營總於十一月十八日追至睢甯縣東溝集地方會合臨淮馬隊黃開榜所派馬勇將賊擊敗斃匪二千餘名其敗殘餘匪亟須乘勝追擊乃據該營總稟稱敗匪於二十一日山灘上晁水過河因運河東岸棍教各

匪猖獗臨淮馬隊黃開榜所派馬勇業已撤回該營總自以隊單亦於二十五日撤回永城聽候札飭等情查此股竄匪既經我軍擊敗其餘敗殘之匪自應認真追剿以期淨絕根株乃輒以隊單爲詞撤回永城以致敗匪闖入東境實屬不知緩急應請旨將候補副都統營總富和卽行革職仍畱營帶隊以觀後效 上諭見在李城一股已竄入東境如張落刑前往句合勢必由徐宿一帶經行著唐訓方吳棠選派得力將弁確探賊蹤迎頭奮擊毋令竄越汝甯踞匪剿辦正當得手著張之萬毛昶熙嚴飭在事各軍豫防張逆南竄與之句合僧格林沁見在督隊進攻韓樓計可剋期攻毀仍著激勵馬步兵勇將渦河迤北賊圩次第掃蕩以期直擣老巢殄除巨憝黃開榜因東岸棍教各匪猖獗輒將馬勇撤回富和遂亦撤隊回紮永城退縮不前均堪痛恨富和見經僧格林沁

等參奏革職責令戴罪自效著吳棠將黃開榜退縮貽誤情形據實嚴參毋稍瞻徇清淮各營本歸僧格林沁節制嗣後如再有畏葸愒事員弁著該大臣隨時參辦以肅軍令將此由六百里各諭令知之○諭都興阿奏遵覆李世忠剿賊及通海等處防堵情形各摺片李世忠見在進攻九洑洲既據都興阿奏該提督尙無不肯出力之意著曾國藩傳諭李世忠督飭所部迅將九洑洲一帶賊壘剋期攻拔毋稍畏難並著都興阿飭令副將馬步雲等併力助剿該逆慣於乘虛尤當加意嚴防毋令北竄賊蹤逼近通海等處圖由福山北竄都興阿等雖已調郭定猷等師船嚴密防範第該處關繫江北大局恐師船尙形單薄著都興阿等再行抽調師船認真防範至李鴻章招募揚勇原因滬上兵力未厚第江北各營月餉僅止三兩且須五六十日始能一關必至該處得力之勇

改名應募相率引去於江北軍務大有關係著李鴻章飭知委員
卽行停止該撫籍隸皖北廬鳳一帶民風强悍著派員前往招募
必可訓練成軍並著酌量辦理上海月餉何以每名有七八兩至
十二兩之多恐有常勝軍潛赴江北招募之事尤當嚴行禁止揚
防餉項未充如上海尙能寬裕著李鴻章酌量接濟本日據中允
錢寶廉片奏請官運淮鹽以裕軍餉等語所奏與戶部前奏是否
可行著會國藩一併悉心議奏錢寶廉片著鈔給閱看將此由六
百里各諭令知之尋奏淮南引鹽體察見在情形礙難改歸官運
應請從緩辦理下部知之○諭英桂奏參將宋憬詩不遵調遣一
摺據稱多隆阿飭宋憬詩赴三原防剿該參將中途改變由白馬
渡過河多隆阿見派兵追殺英桂亦派與宋憬詩素識之副都統
常海赴榮河一帶追尋善爲籠絡並派撥馬步追剿已咨多隆阿

添派得力馬步隊數百名交德興阿星夜跟追等語前因勝保所部降眾叛卒雜出其中諭令多隆阿妥爲駕馭乃竟派宋憬詩防勦三原已屬調遣失宜且宋憬詩於初四日搶渡該大臣於初五日發報何以一語不及實屬疏忽英桂亦防範未周本日已將多隆阿英桂交部議處矣宋憬詩由榮河東渡該省防河各員所司何事甚可痛恨見在多隆阿攻勦同州回匪老巢恐有偷渡情事著英桂嚴飭防河各員認真防範宋憬詩狼子野心屢次滋事莫若乘此機會派兵殲除免生後患所部人眾未必盡甘心爲亂著英桂派委妥員傳旨曉諭如有願殺賊立功者卽派員帶領赴陝交多隆阿調度其願回原籍者卽令將馬匹器械呈繳酌給川資妥爲遣散多隆阿旣未能駕馭於前必應除患於後著卽添派馬步渡河追勦務期聚而殲旃宋憬詩如同原籍必由河北行走且

恐闌入直境著文煜張之萬偵探賊蹤迎頭截擊該馬勇素無紀律不難立即殲除儻令滋蔓必當重治其罪再僧格林沁奏稱並無派馬隊赴直之事文煜何以率行陳奏恐有逆眾假冒情事該省探報之不實亦可概見文煜身任畿疆而漫不經心至此實爲可愧著卽查明具奏將此由六百里加緊各諭令知之○諭勞崇光奏高州等處勦辦賊匪情形各摺片張凱嵩奏攻克老縣桂嶺等處賊巢進規蓮塘一摺逆首陳金缸自陷信宜後令其黨鄭金劉超等扼紮大井石骨兩路以阻我師經勞崇光派令參將方耀卓興等分路進勦疊挫賊鋒惟自本年八月以後營中疫病盛行賊匪乘虛攻襲致卓興一軍潰於車田其分股竄擾化州羅定一帶之匪雖經官軍擊退而賊勢並未少衰陳逆本係積年猾賊兼以匪黨眾多高州勇糧積欠至數十萬兵力難支以致未能痛勦

參將卓興方耀據勞崇光奏稱皆係粵東百戰健將而卓興尙有車田之敗則其餘將士不能得力已可概見若再遷延不振賊勢必更蔓延劉長佑計已自潯起程卽著兼程前進接受督篆迅將高州等處軍務妥爲籌畫嚴飭參將卓興等選募精壯裁汰傷病重整軍務將陳逆一股悉數殲除並著該督設法籌措勇糧毋令缺乏至西甯縣城爲西匪張津洸六等乘虛攻陷勞崇光已令德慶州知州郝有金兼署西甯縣事激勵兵團迅圖克復並調水陸兵勇前往援應著劉長佑嚴飭在事員弁實力勦辦毋得稍有遷延封川開建土匪經劉式恕督兵殲斃多名該處已漸臻綏靖著劉長佑督令該地方官將餘匪實力搜剔毋令一名漏網至恩平等縣土客互鬪經勞崇光派委官紳悉心勸導並將頑梗之徒懾以兵威驅除出境其勢已漸解散見惟新興陽江尙有客民屯聚

嗣後各地方官果能分別良莠得其要領自不至再行搆毀劉長佑於到任後務當督飭官紳妥爲辦理使小民早登衽席兩造永息爭端是爲至要蓮塘踞匪以老縣桂嶺爲門戶業經張凱嵩派兵攻克並派教諭韋鶴揚等齎示往諭各徭助順攻逆一面安撫難民所籌均尙妥協卽著飭令派出各員和衷協力迅速藏功儻該員等始勤終懈或致功墮垂成卽著嚴參治罪逆首張高友身受重傷所稱已經傷斃之語是否屬實並著張凱嵩查明具奏此時逆巢未克總當鼓行而進實力勦辦萬不可以逆首受傷稍涉大意將此由六百里各諭令知之○諭前因貴州教民案件尙未辦結疊諭勞崇光迅赴貴州會同崇實等秉公辦理見在該前督諒已起程著卽兼程前進不得稍涉遷延張亮基前令署理黔撫該前督到黔張亮基必已先到卽著商同辦理務須權中外之勢

斟酌妥善於明年二月內辦結將此由六百里諭令知之○戊子
諭議政王軍機大臣等文煜奏遵由南路進遏匪蹤一摺張錫珠
股匪前據遮克敦布奏稱竄回館陶直境業已肅清該督前奏亦
謂該匪由鉅鹿南遁何以此次復稱甯晉鉅鹿新河尚有賊蹤游
弋深州與甯晉新河相距匪遙其餘賊數多寡竟不能探悉確情
以總督大員出省督兵於所屬地方賊情憤憤若此尙安望其用
兵制勝究竟賊蹤見在何處爲數尙有若干殊增懸系文煜著痛
加儆省卽將確探實在情形明白具奏如果直境賊縱未淨兵力
仍形不足卽仍遵前旨迅速奏聞再行酌量調派均著相機妥籌
務得確實以憑防剿而靖畿疆毋得回護前奏稍涉欺飾懍之愼
之將此由五百里諭令知之○諭譚廷襄奏費縣追剿擒匪沂州
攻克匪圍並辦理淄川踞匪情形各摺片沂州土匪經同知奎芳

等將城前莊匪巢攻毀不過小有斬擒譚廷襄仍當督飭該地方官竭力掃除毋令與外匪勾結爲患李城一股由費縣竄向嶧縣之石城固經該處團練擊退轉竄費縣之蒙山圖越九女關都司楊通廉縣令王成謙等帶隊扼截該匪雖未竄越而賊眾兵單官軍勢難持久黃國瑞兵勇尙無馳抵蘭山信息著譚廷襄迅速催提並著吳棠嚴檄該總兵速赴沂郡會合堵剿富和一軍見在已抵嶧縣著僧格林沁譚廷襄飭令該營總與德楞額跟追攔截德楞額日久無功儻再縱賊竄過關隘卽著將該革員嚴參治罪至東省股匪眾多兵力止有此數不敷分撥僧格林沁仍當酌量情形力籌兼顧淄川官軍圍城日久未能攻克所竄地道屢未得手是陳顯彝之不能得力已可概見已革知府吳載勳辦理此事始終貽誤前據畢道遠等聯名奏參諭令譚廷襄查辦迄今未據覆

奏譚廷襄既將該二員誤用於前豈可復回護於後著卽嚴申紀律飭在事文武剋期進攻克復城池其從前貽誤各員卽行參撤以肅軍律將此由六百里各諭令知之○諭多隆阿奏接統各起兵勇分別去畱並宋憬詩渡河東歸涇陽被陷各摺片宋憬詩以匪首投誠經朝廷赦罪錄用乃屢思逃竄其爲心懷叵測無疑卽其不遵調遣一節多隆阿自應趕緊拏辦豈必待其沿途滋事始行截殺著卽趕派精壯馬隊渡河追擊毋任脫逃英桂所派之常海等是否追及仍著飭令德興阿繞前截擊若縱令一名東歸惟英桂德興阿是問多隆阿所請飭山東撫臣設法剪除已諭令譚廷襄派兵攔截惟山東賊眾兵單甚不可靠仍以就地殲除爲要該大臣軍律素嚴若不將宋憬詩追擒正法以後紛紛效尤又將何以制之著卽飛咨英桂會籌迅辦無稍姑息涇陽被圍已久雷

正綰未能先事豫防成祿近在三原未能救應均著交部先行議處仍責令雷正綰迅卽克復母任久踞西安省城緊要著多隆阿卽飛催穆騰阿赴任嚴密布置另片有勝保途中患病在邵陽就醫之語著多隆阿嚴飭該委員如勝保病體略可支持卽行押解起程毋許逗留將此由六百里加緊各諭令知之○諭前據奕梁等疊次奏到甯夏回氛肆起郡城平羅靈州在在危急飛咨鄂爾多斯阿拉善東西兩盟蒙兵赴甯援救等語甯夏回眾滋事非厚集兵力刻難殄除而甯夏滿兵徵調頻仍存營無幾甘肅兵力復因東南一帶籌防籌勦分撥爲艱甯夏密邇蒙古地方已由該將軍飛咨該王等就近援救諒能朝發夕至痛埽賊氛著理藩院由六百里傳諭阿拉善親王貢桑珠爾默特迅速調派阿拉善鄂爾多斯各盟精兵數千卽日率領由賀蘭山口徑趨平羅甯夏與內

地兵練覘賊所在合力勦辦以期節節埽蕩諒該王必能踴躍從事不至遷延觀望貽誤兵機也將此諭令知之○諭吏部嚴定軍務省分人員憑限○申禁刑部濫收人證○己丑諭內閣前因直東交界降眾張錫珠滋事據文煜奏稱接據肥鄉邢臺等縣稟報僧格林沁派撥馬隊由威縣一帶追勦當以事涉可疑諭令查明是否屬實並經查詢僧格林沁旋據覆稱並無其事茲據文煜奏稱遵查前項馬隊係由僧格林沁派赴山東富和一起探役誤聽訛傳等語文煜於本省緊要軍情奏報不實實屬顛預著交部議處其稟報不實之肥鄉邢臺等縣各員並著文煜查明參奏○諭議政王軍機大臣等文煜奏賊氛仍未少衰請速撥馬隊等語本日已諭令神機營調派馬隊一千名派成保薩薩布統帶徑趨深州束鹿會同該督相機勦辦京兵未到以前文煜仍當就見有兵

力飭屬堵剿無任蔓延新河被匪衝入倉庫錢糧有無被劫情事該縣帶勇收復有無捏飾著文煜查明具奏伊縣阿前在新河接仗此次匪竄新河何以僅據地方紳團阻截伊縣阿見在何處遮克敦布前奏賊匪步隊已被擊散馬隊已不滿千且有回竄館陶直境肅清之語見在馬步各匪爲數尙多足見前奏全屬虛妄卽以竄回館陶之馬賊數既不多該副都統見駐館陶何以不聞派一旅之師從而迎擊坐令已散之賊兇燄復張實屬形同聳聳著遮克敦布卽查明此股賊匪實在下落首犯張錫珠見在何處據實具奏並與文煜會籌辦理如該匪被擊南竄該副都統卽派兵截剿以期迅速殄除若再不知奮勉專以粉飾爲事定卽從重治罪文煜另片奏接奏寄諭並僧格林沁咨文始知並無馬隊到直係因營總富和一起馬隊派赴東省以致誤傳尙無賊匪冒充情

事軍營偵探最關緊要文煜等嗣後務當遴委幹員申明軍律事
事從實奏報毋得稍涉欺罔致干重咎將此由六百里各諭令知
之○諭明誼奏俄國使臣在塔爾巴哈台會議分界事宜不遂所
欲隱忍回國該使臣所指科布多卡外各地名均在鄂木嚕克大
壩之北見值大雪封山道路阻滯未能出卡遠行查看著俟明歲
春融後卽飭令委員阿克敦布等馳赴該處將鄂木嚕克之北吹
河一帶俄人舊蓋木房共若干間親行勘明此項房屋起自何年
此外有無另在他處建蓋房屋均著逐細查明建立原委以備將
來與俄使理論撤去所有該處總管及鄰近毗連之蒙古王公各
愛曼均著明緒會同明誼豫爲曉諭加意撫綏聯絡聲勢至卡外
地方何處無礙蒙古生計何處可以議分亦須明春周查履勘豫
爲繪圖以便臨期奏明候旨辦理錫霖旣患骹疾所有分界事宜

卽著廣鳳幫同明誼辦理將此諭令知之○調神機營馬隊一千
名赴直隸剿賊○庚寅諭內閣我朝自 列聖以來於御極之初
各直省督撫選舉孝廉方正原以振拔幽滯用端風俗典至鉅也
朕於上年御極後卽詔各直省督撫秉公選舉並因知縣黎庶昌
條陳復諭各督撫等迅速選舉見距上年頒詔之日已閱年餘而
各省選舉甚屬寥寥十室之邑必有忠信今各州縣大者不下數
萬戶小者亦萬餘戶豈無忠信誠懇之士堪膺是選良由地方有
司視爲具文旣不虛心延訪而潛修之士又不肯干謁公庭以致
應詔無人足國家登明選公之典轉成具文其何以振風俗而勵
人材著在京四品以上大員及直省督撫學政無論紳士布衣其
有實在堪膺孝廉方正之選者各舉所知總以躬行實踐爲先不
准專取文詞藻麗者濫膺盛典俟送部引見後候旨分別錄用其

有年登耄耋或誠樸無華足爲里閭矜式不願來京者卽著該地方官歲時存問賜以酒米俾後進知所則倣用副朝廷側席旁求振興實行之至意○諭太學爲自古培植人才之地我朝振興庠序加意教育世宗憲皇帝賞給庫銀增輯黌舍首善之區四方觀瞻所繫必得如唐之韓愈宋之胡瑗躬行實踐講明正學以爲表率人材自能蒸蒸日上乃近來國子監專以文藝課士該祭酒等旣以是爲去取而士子亦復以是爲工拙於造就人材之道何裨焉著嗣後於應課詩文外兼課論策以經史性理諸書命題用覘實學並著該祭酒等督飭各堂助教學正學錄分日講說獎勵精勤懲戒游惰黜華崇實以端趨向其有畱心時務通知古今者亦當隨時獎拔以勸多士該堂官爲諸生師長尤當自飭廉隅俾知矜式用副教育人材至意○諭自來儲材養士必視學校爲盛

衰我朝 列聖相承庠序修明敦崇實學 皇考文宗顯皇帝御

極之初卽命生童就試者兼習性理等書原冀其趨向一端則學術自正以收化民成俗之效乃近來各省教職等官並不實力奉行認真訓課惟知索取費禮脩儀貪得無厭又其甚者往往干預地方公事並或遇事魚肉士子諂諛紳富又安望其經明行修足爲士林表率耶嗣後各省學政務當整躬率屬督飭各教官讀書立品毋爲士子所輕平時訓導諸生總以躬行實踐爲歸勿崇尚浮華勿虛應故事其稱職者准各學政會同督撫隨時保奏給予獎勵如聞茸充數及少年浮動不克舉職者並著隨時甄劾不必待至大計年分庶人知自愛爭自濯磨並飭各教官分日於該處城鄉市鎮設立公所宣講 聖諭務使愚頑感化經正民興正學昌明人才蔚起實有厚望焉○諭翰林院爲儲才之地詩賦亦係

古雅頌之流乃近來積習相沿專以此揣摩爲進身階無裨實用著自明年癸亥科起散館改詩賦爲策論皆准直據所見毋避忌諱

○以額勒和布爲內閣學士

由翰林院侍講學士遷

○以景霖爲左副都

御史

由奉天府尹遷

○復降調安徽按察使恩錫原官發往山東軍營

交署巡撫譚廷襄差委○辛卯諭內閣昨據步軍統領衙門奏查

鈔勝保家產並於丁祥家搜出勝保來往書函及家信等件一併

呈覽所有勝保來往書函家信著議政王軍機大臣卽在軍機處

公同監視焚毀○諭議政王軍機大臣等唐訓方奏遵旨密陳駕

馭苗練及李世忠情形一摺另片奏追剿擒匪獲勝各等語巢縣

踞賊踰伏未動唐訓方恐南路大兵雲集該匪乘虛北犯調派張

得勝進駐梁園扼其要隘布置尙屬周妥惟壽州正陽兩城最爲

淮西重鎮不可無重兵扼守唐訓方旣難信苗練不至反覆自應

先事籌防著仍遵前旨遴派得力員弁酌撥勁旅前往駐紮保全要區不得以北偏捻巢南禦髮逆爲詞稍涉推諉李世忠增卡抽釐貪得無厭情殊可惡第見在逆匪渡江北竄該提督防剿亦甚喫重該署撫所稱遇有交涉事件不動聲色委婉籌商深得駕馭龍絡之法嗣後卽照此辦理將此由六百里諭令知之○諭張之萬奏明港驛路漸通飭各軍進剿邢集陡溝踞匪一摺據稱邢集藍店各匪圍攻寶峯民寨疊經副將李白衮等斬首多名確山縣屬之熊藍兩寨亦畏罪乞降卽著張之萬飭令該縣知縣王觀瀛相機妥爲收撫毋令降而復叛其附近之熊王寨旣經攻破明港驛路自可漸次疏通惟捻首陳大禧竄踞蕭王寨並恃有邢集陡溝爲之羽翼若不將邢集陡溝迅速攻破陳逆斷難就擒該署撫旣已飭李續燾等分督各軍進剿著卽督飭該總兵等奮力剿辦

惟該署撫接據僧格林沁飛咨有毫捻張落刑西竄之說沈項去汝郡較近卽著毛昶熙隨時偵探實力扼堵張曜一軍並著暫緩南剿如沈項有警卽著就近扼剿毋得貽誤將此由五百里各諭令知之○諭瑛棨奏髮逆陳得才等股匪已由竹山一帶紮營百餘里直抵陝西平利縣勢甚猖獗當飭毛震壽竭力抽撥兵勇前往堵禦等語該省腹地回匪未靖豈可又添外患毛震壽所部兵勇本不甚多且攻剿洋縣踞匪日久未克豈能更有餘力兼顧平利前據官文等奏調派梁作楫楊朝林唐協和歐陽正墉等軍前往房竹一帶相機剿辦該匪見已竄逼陝境著卽嚴飭梁作楫等迅撥勁旅馳往平利邊界遏賊西竄興漢之路務將此股髮逆就地殲除官文等素顧大局諒不至驅賊出境貽患鄰封蹈鄭元善覆轍也將此由六百里各諭令知之○諭恩麟奏回漢挾嫌械鬪

見派彈壓查辦一摺河州東鄉回民素稱獷悍向與漢民牴牾見在與狄道所屬之崔甘莊漢民因爭渡起釁又復肆行焚殺搶掠雖其中容有隱情而糾眾挑釁即敢恣意橫暴其爲藉端擾害顯而易見甘省回眾止有惠安堡一處甘心就撫其餘各處回氣仍未稍戢河州等處距省僅百餘里情形尤爲喫重著卽商同經文恪督飭派出兵弁乘其初起之時妥速勦辦或一面委員解散分別辦理務期迅速戡事毋令日久蔓延已革提督成瑞獲咎甚重係奉旨解交刑部審辦之員該護督既經派令前往查辦一俟辦理完竣仍著遵旨解京不准藉端奏畱見今甯夏軍情究竟如何奕梁所報是否失實著恩麟迅速查明具奏潼關防務漸鬆如道路稍通熙麟卽遵前旨赴任布置一切另片奏山西八月間所解甘餉十一萬兩已經到甘本日復據英桂奏籌撥銀十三萬兩於

十一月十八日起程諒可不日解到前後共計已解到銀二十四萬兩爲數已屬不少甘餉固關緊要而新疆欠餉最多之緊要各城實有刻不容緩之勢著恩麟體察情形此項餉銀斷不准僅顧省城之用務須分別酌撥以顧邊疆大局將此由六百里諭知熙麟並傳諭恩麟知之○諭駱秉章奏官軍截剿周逆巨股連獲大捷生擒首逆川北一律肅清一摺滇匪蹂躪川省於今四年該督抵任甫及一年卽能將各逆殲除剿辦甚屬迅速深堪嘉尙惟郭逆由陝竄入廣元若令仍回陝省必致攻剿費手著駱秉章飭令在事將弁務將郭逆在川殲除截其入陝之路前諭該督查參毛震壽貽誤各情並酌保陝西藩司候旨簡用該督素能畱意人材卽著迅速覆奏敘南軍務關緊至要劉蓉諳練戎機著該督迅速前旨飭令出省督剿以期及早戴事將此由六百里諭令知之○

諭據薛煥李鴻章奏布路斯國換約事竣各摺片此次該大臣等於辯駁該公使要求各情隨機杜絕頗爲妥協惟該公使照會內有另外設法辦理之語恐其尙有饒舌已諭知總理各國事務衙門妥爲察看務期內外一體杜其要求儻該公使在滬或有干請仍著該大臣等設法辦理將此由五百里各密諭知之○諭戶部各省捐輸團練止給虛銜封典不得予實在官階○壬辰諭內閣潘鐸奏拏獲戕害大員案內要犯分別審擬各摺片據稱該署督自川赴滇畱心探訪鄧爾恆實係副將何有保遣人搶劫謀殺並將首從各犯戴玉堂等拏獲訊辦據戴玉堂等供稱上年二月間鄧爾恆升任貴州巡撫行李馬馱中途被何有保帶人劫去鄧爾恆稱欲到京參奏嗣因調任陝西巡撫行至曲靖借住府署何有保聞有參辦之言密令史澡戴玉堂等糾領練眾擁入署中將鄧

爾恆戕害並接搶多賊何有保因戴玉堂隱匿贓物將其捆縛拷打戴玉堂氣忿潛逃本年閏八月間戴玉堂糾約多人乘夜將何有保殺斃史深戴玉堂等業經訊明正法各等語何有保以二品武職素不守法奉公疊次糾搶財物殘害官民並戕害封疆大吏實屬行同叛逆業被戴玉堂謀殺著仍照例戮屍梟示以儆兇殘雲南巡撫徐之銘於鄧爾恆被戕一案據潘鐸奏稱訊據各犯供稱並無知情徇縱情事惟案情重大疏於防範實難辭咎著照潘鐸所請交部議處○諭議政王軍機大臣等有人奏毛震壽統兵進剿從未親督一陣縱兵騷擾臨陣則川勇川匪互認鄉親毛震壽之子二人公行賄賂等語陝南軍務遷延已久毛震壽辦理自係不能得力若於所奏各款更出情理之外著多隆阿按照摺內所奏各款確切查明據實參奏如果屬實卽著多隆阿另派得力

大員前往統率原摺著鈔給閱看勝保家人丁祥如已在陝拏獲
並著卽行押赴來京交刑部審訊將此由五百里諭令知之○諭
文煜奏北路進剿情形一摺前據該督奏稱賊數多寡傳言不一
見在該督馳抵冀州距賊所屯之地僅十餘里何難探悉乃此次
奏報仍未將賊數多寡敘明畿南被擾地方甚多賊勢縱橫若此
是否併聚一股往復奔竄抑係分股四出紛擾見踞棗強之賊是
否全股由東鹿而來其甯晉鉅鹿新河廣宗平鄉南宮東鹿等處
見尙有無股匪游駛亦未據該督詳敘行軍之道首在洞悉賊情
方能調度布置著卽迅速查明詳晰具奏毋任仍前憤憤貽誤干
咎伊綿阿在冀州勦賊僅斃邊馬數十人於匪勢何損著卽嚴飭
該總兵及委員余承恩會擊棗強之賊務當就地殲除不准以驅
入東境卽爲了事成保薩薩布所帶京兵不日可抵冀州該督務

宜合力兜剿並速飭天津河間文武一律嚴防毋令賊蹤竄入此
股賊匪起事本係遮克敦布辦理不善所致著卽督兵嚴防東境
與直隸官軍會合夾擊迅速殲除以贖前愆儻縱令賊眾歸巢與
降眾勾結必將遮克敦布從重治罪譚廷襄剿辦克屬及淄州股
匪日久無功若再縱令此股折回東境則兵力益難兼顧著卽嚴
飭接界地方文武實力堵剿毋令紛竄將此由六百里各諭令知
之○諭毛鴻賓奏楚師援粵克復老縣要隘各縣摺片蓮塘之賊
恃老縣山京桂嶺各隘爲門戶老縣旣克各巢之匪自生疑懼其
張高友逆首如果已伏冥誅賊中無主更必易於潰散卽著江忠
義增募勇丁趕緊成軍統帶前往督同總兵李明惠王永章各軍
乘勢繼進江忠義到粵後所有進剿蓮塘各軍均歸節制務將該
處積年踞匪剋日殲除分別剿撫毋畱後患軍前事宜著准其由

江忠義自行馳奏如粵省迅就肅清而江皖軍情尙緊仍卽移師東指以資臂助曾國藩前奏請將江忠義一軍調赴皖省茲據毛鴻賓所奏以接曾國藩咨令先行馳赴江西而該撫以江忠義所部勦辦蓮塘之賊正在得手可因其勇氣次第收功未宜輕動其江防緊要已另派江西補用道席寶田招募勁勇三千名發給行賞趕緊成軍前赴江省所籌尙屬妥協此時祁門業已克復江防應已稍紓而皖省軍情尙緊唐訓方所部各路防剿分布不遑席寶田一軍應否飭赴皖省並於何處分防助剿著曾國藩酌量調度石達開股匪游弋遵義黔西疊次竄擾敘永皆爲川兵所扼仍著毛鴻賓嚴飭總兵趙福元等軍分扼各路要隘聯絡堵剿毋令蔓延將此由六百里各諭令知之○諭潘鐸徐之銘奏景東廳被賊竄踞礮臺失陷見飭防剿一摺景東廳爲迤西赴迤南要道該

同知等未能固守致令匪徒闖入寶屬堵剿不力署景東同知通判張象奎護景蒙營遊擊千總普承清均著先行革職仍責令趕緊帶練攻復以贖前愆如查有棄城逃避情事著潘鐸等嚴參懲辦磅嘉失守南安州情形喫重尤須趕緊防剿以固楚雄並遏其竄入普洱之路潘鐸另片奏擬俟部署稍定出省巡閱藉以訪查地方情形體察漢回心迹等語雲南庶務久弛該署督既經到任亟應出省閱視整頓營規著卽認真簡閱務期一兵得一兵之用不可虛應故事省門一帶撫務已定此外負固不服如迤西大理等屬亦須次第剿辦以期漸次廓清前因韓超奏馬聯升先派委員桂金輪至普安廳議和回眾四五千人以議和爲名齊進廳城將署同知錢璩等看守分踞各衙門占住民房無所不至當經諭令徐之銘將馬聯升等卽行撤回茲據潘鐸片稱馬聯升已改委

署曲尋協副將並未赴安義鎮總兵之任其桂金輪所帶回眾是否馬聯升所派卽著潘鐸等查明飭令趕緊撤回如係另股匪徒卽知照黔省派兵勦辦韓超前奏何占標被回匪馬連牲勾通練匪下手戕害本日徐之銘查辦各犯並無馬連牲其人並著潘鐸徐之銘再行查明具奏徐之銘近來措置乖謬朝廷頗有所聞嗣後務當清心寡慾痛自儆省事事與潘鐸商籌妥辦使滇省日有起色方可保全令名如仍前謬妄或再有人參劾卽朝廷亦不能曲從寬宥也懷之慎之將此由六百里各諭令知之○諭文煜查追商欠鹽課○予雲南被戕陝西巡撫鄧爾恆貴州被戕副將何占標等祭葬世職○癸巳諭內閣僧格林沁督兵勦賊懋著勲勞兩載以來由直隸山東以至河南安徽境內勦辦捻逆各匪櫛風沐雨辛苦備嘗見在進攻亳州各捻巢穴疊有斬獲勦撫兼施時

當冬令布屋單寒殊深厯系著發去黃面貂尾馬褂一件交僧格林沁祇領以示體恤○諭議政王軍機大臣等據譚廷襄奏稱李城股匪見向西南梁邱一帶竄去仍欲與蘭滕費嶧各匪會齊竄赴登萊青等處滋擾梁邱爲棍幅各匪窟集之所距教匪巢穴甚近譚廷襄務宜督飭兵勇嚴密堵剿毋令糾合句聯並飭曾逢年等嚴防登萊青一帶俾該匪不得竄入致滋蔓延淄川股匪久未殲除儻李城等捻股竄至與之句聯辦理更難著手著該撫卽嚴督在事文武迅克城池毋再遷延黃國瑞一軍已至宿遷該撫應卽迅速催令由邳邳交界之長城攻入並飭沂州守文彬督兵調團馳赴會剿富和一軍已抵東境卽著僧格林沁譚廷襄檄該營總實力攻剿不准遷延貽誤德楞額以獲咎之員不思立功自贖輒敢於軍情緊要之時藉詞退避城內不法已極著僧格林沁譚

廷襄嚴檄該員剋日進兵殺賊自效如再遷延觀望卽在軍營正法以肅軍律諒僧格林沁亦不肯代人受過也傳聞僧格林沁左手瘡癰尙未痊愈見在調理若何當此天氣嚴寒朝廷深爲廕念將此由六百里各諭令知之○諭駱秉章奏舊病增劇請開缺調理一摺見在石逆句結滇黔土匪竄入敘南郭逆由陝竄回廣元該省邊防仍形喫重必得該督指揮調度方能以次剋除卽肅清之後辦理善後事宜亦非老成練達之員不能收長治久安之效朝廷亦知該督年逾耆艾歟厯心勞值此時勢多艱兼之蜀地險要一時替代難得其人該督業經賞假兩月儘可安心調理一俟就愈卽行銷假視事仍隨時附報奏聞以慰廕念將此由四百里諭令知之○甲午諭內閣前據禮部奏廣東舉人揀選知縣桂文燦呈遞經學叢書四面當交南書房翰林詳加閱看進呈該舉人

所呈各種考證箋注均尙詳明羣經補證一編於近儒惠棟戴震段玉裁王念孫諸經說多所糾正薈萃眾家確有依據具見潛心研究之功惟古人通經致用總以躬行實踐爲歸經師人師合爲一致方能羽翼聖經無慚名教箋注始於漢儒而鄭康成行誼篤實鄉愚感化至以鄭公名其鄉其他經明行修者尤指不勝屈可見讀書明理必須體用兼備不徒以記誦訓詁見長也桂文燦既能潛心古訓不蹈浮靡之習務當益加刻勵身體力行勉爲有體有用之學以備國家任使書畱覽○諭前因已革廣東候補知縣許慶琿匿名蒙捐招權納賄當經交部照例治罪茲據刑部將該犯罪名定擬具奏許慶琿以督署家人輒敢蒙混報捐藉勢攬權情節較重應照所議從重發往新疆酌撥種地當差事犯雖在恩詔以前不准援免並著於該省藩署門首先行枷號一月滿日起

解已革遊擊章昇耀卽章順以參匪濟私經晏端書訊實就地正法實屬罪有應得惟未將照何刑律治罪之處聲敘明晰殊屬疏漏晏端書著交部議處○諭議政王軍機大臣等文煜奏追剿賊匪獲勝情形遮克敦布奏續獲勝仗崇厚奏添撥兵勇馳抵河閒防堵各一招此股匪徒行蹤飄忽此追彼竄必須四面兜拏方可制其死命文煜見已移紮冀州著卽督飭各路官軍併力追剿遮克敦布以武職大員督兵剿賊從未親歷行陣力遏賊氛見在匪勢蔓延若再不知振作自問當得何罪著卽會同孫治等由威縣跟蹤追剿不得遷延畏葸致干重咎河閒爲畿東門戶崇厚見飭護天津鎮春霖挑選馬步兵勇前往擇要駐紮眞能先其所急著嚴飭該護鎮認真偵探加意巡防總期力扼兇鋒痛加剿洗不可有名無實將此由六百里各諭令知之○調鄭敦謹署陝西布政

使

由山西布政使署

○

乙未諭內閣步軍統領衙門奏變通步軍營官員

補缺章程請旨遵行一摺八旗步軍營官員自兩翼翼尉至步軍校等額設四百六十餘員均有地面之責該員弁如果人人稱職則稽查奸宄緝捕盜賊自能日有起色乃近來地面各官率多因循疏懈習染成風與其疏防債事始行奏參曷若設法變通以資整飭著照所請嗣後入旗地面各官如有庸劣無能公務廢弛者卽著步軍統領等奏參褫革其才不勝任卽奏請咨回該旗營所遺之缺均由該衙門行文各旗營咨取有守有爲之員與本營應升人員一體揀選補放其各旗營出色人員准由該衙門指名奏調該員等補缺後扣滿三年如能始終奮勉准由步軍統領等據實保奏無論旗綠各營應升之缺卽行坐補以昭激勸如或人地不宜卽將該員送回原旗營另候補用庸劣不職者立予參革至

咨回各員應如何量予錄用之處著八旗滿洲蒙古漢軍都統妥議章程具奏至所稱該衙門額設郎中等共十二員不敷差委等語准其於宗人府六部理藩院等處咨取才守兼優之司員各二員其各衙門出色人員並准指名奏調與保送人員一體帶領引見派爲兼辦司員二年期滿如果辦事認真卽著保奏獎勵經此次變通章程之後務當督飭該營官員及辦事司員等竭力振作實心任事毋得再蹈因循積習各旗都統及部院大臣亦當隨時畱意人才認真保送以資治理而期整頓○議政王軍機大臣等奏遵 旨編纂四國新檔告竣報聞○丙申諭議政王軍機大臣等文煜奏連日追剿獲勝賊已回竄直東交界並遵查棗強之賊全股竄臨清州境各摺片文煜經疊次訓飭此次奏報各情當爲可據直東地面犬牙相錯北路尤須備禦不虞該督已令孫治督

飭兵團嚴防奔竄大名道祝瑄業經抵任並著飭令將地方防務安速籌辦於查緝奸宄繕守要隘均須激勵鄉團以資整頓勿令賊匪得以乘閒肆其衝突京兵未宜遠出卽令暫駐直隸邊界以爲鎮遏另摺奏參總兵伊綿阿勦賊不力請以都司降補仍令畱營差遣殊屬輕縱據奏伊綿阿節節退縮並縱兵搶掠可惡已極著卽行革職拏問交文煜嚴訊據實奏明候旨辦理將此由六百里各諭令知之○張之萬奏總兵余際昌率軍行抵正陽扼紮王家大塘其附近之劉夾道魯臺兩賊寨怵於兵威相率赴營納款該鎮責令獻出擒首多名正擬卽日進攻張鳳林巢穴緣東北後路小王寨匪首雷青和率黨盤踞阻我進兵之路宜先攻該寨以孤賊勢十二月初三日該鎮督軍圍攻賊眾堅壁死守我軍躬冒鋒鏑負土填濠副將李殿元策應之軍亦至參將徐連陞等由東

南踰濠直上火器環擊延燒寨內草房我軍奮勇而入賊仍拌命
抗拒徐連陞等身受重傷仍裹創力戰匪黨奪門意圖潰圍而出
李殿元等自外堵擊總兵趙鴻率馬隊由後趕到搜捕寨中餘
黨殄滅殆盡當將小王寨攻拔殲匪一千餘名查正陽一帶賊眾
八嵎勢成犄角伏莽徧野官軍不能越巢而進茲經余際昌督率
弁勇先將小王寨攻拔剿除悍黨從此進圖張逆可無後顧之憂
已飭該鎮乘銳進軍力圖掃蕩臣見亦拔隊南行不日抵汝當會
同毛昶熙妥籌方略相機攻剿又奏汝南擒首陳大禧竄踞淮南
之蕭王寨經臣嚴飭在事鎮道合力攻剿該逆焚寨逃逸陡溝渡
淮西走疊經臣嚴飭各帶兵官四面兜圍乃該逆鋌而走險陰料
邢集賊寨爲官兵所必攻勢難藏匿竟竄繞邢集以北適湖北逆
捻林振山匪黨逃在邢集當與陳逆勾結合竄湖北隨州之倒石

橋十一月二十九日攻破隨境搗鼓臺寨十二月初一二等日在小林店焚掠復竄擾守順寨襄脅頗眾勢復猖獗查守順寨在信陽西北距隨州小林店及信陽州城均不過數十里楚豫兩省邊防犬牙相錯該逆餘燼復然恃有楚捻爲之黨惡此勦彼竄竊恐復肆蔓延除嚴飭總兵李續燾密速掩捕令地方文武率團隨地堵剿並咨楚省疆吏派兵會擊外仰懇 天恩飭下湖廣總督官文湖北巡撫嚴樹森趕緊派兵一體兜剿以期迅拔松株 上諭正陽匪首雷清和盤踞小王寨阻扼官軍進攻張瀾林之路經總兵余際昌督軍攻克此後進兵之路不至爲賊寨所阻著張之萬卽飭余際昌迅將張瀾林老巢攻克務將該逆首就地殲除正羅新息信確一帶伏莽徧討正宜乘諸軍會集之時力圖掃蕩張之萬計日可抵汝南著卽會合毛昶熙分路進攻早殄逆氛毋稍遷

延陳大澧老巢被官軍攻克後竄踞淮南之蕭王寨勢已窮蹙在
事文武並不嚴密堵剿致令繞出邢集以北與湖北捻首林振山
句合遠竄隨州漸復猖獗該帶兵鎮道毫無堵截實屬玩忽李續
燾一軍見在信陽境內著卽飭令該總兵迅速殲擒並著官文嚴
樹森趕緊派兵會合豫軍一體兜擊不可稍存畛域致垂盡餘匪
又形滋蔓將此由六百里各諭令知之○諭官文曾國藩奏籌辦
新添輪船大概情形一摺據稱與彭玉麟楊岳斌商派蔡國祥盛
永清等統轄分領船隻及每船酌畱外洋三四人司舵司火其餘
酌用楚勇學習駕駛礮位等事所籌均尙妥協輪船駛到計總須
至明年春閒所有辦理一切縷晰情形自應屆時與駕馭輪船之
洋人妥議再爲詳定具奏至所稱兩湖水更能泛江不能出海性
之所習但可駛至上海不能遽放外洋本與總理衙門原奏所擬

同爲江面勦賊之用起見若將來由楚勇而參用浙勇以至閩粵之人由上海而漸至甯波漸至山東天津用以出洋巡哨觀政海邦惟應俟諸異日當與該大臣等樂觀厥成也惟輪船一時不能遠涉重洋恐屆時不聽調遣該大臣亦應豫先議定據曾國藩所奏李世忠一軍扼守江北數城分攻九洑洲賊壘又防南岸石埠橋要隘汎地過寬此次賊眾北渡雖未能扼截上竄而血戰經月路路喫重卒能力保各城屢挫逆氛尙屬功多過少著曾國藩仍卽督飭該提督一軍迅將九洑洲攻克以絕逆匪再行北渡並與南岸大軍聯絡進取如上游賊匪回竄或南岸賊再分股搶渡並嚴督該提督迎截堵剿毋稍疏虞將此由六百里各諭令知之○駱秉章奏石逆自踞敘州府屬之雙龍場分悍黨數萬人屯聚橫江汎以爲犄角僞宰輔李幅猷復率眾蔓延滇境之副官村一帶

意圖搶渡金沙江總兵何勝必帶七營分布屏山縣等處與副官
村之賊夾河而壘十月二十二日何勝必派營官楊耀關等各帶
親兵渡江副官村之賊突出千餘人分三路衝來楊耀關等分隊
迎戰斃其前鋒百餘人賊卽敗退旋分出悍黨兩萬餘人由羅家
坳徑奔高縣二十八日高縣知縣丁良俊帶團迎擊力戰被害縣
城被賊竄踞臬司劉嶽昭率果後營行抵慶符縣之黃沙漕聞報
立飭五營馳援二十九日果後營營官知縣曾紀鳳等抵黃水口
賊眾踞橋負隅我軍分路進攻斃賊數百名乘勢奪門而入賊眾
驚潰紛紛棄城而遁我軍追殺數里斃賊五千餘人遂將高縣克
復時劉嶽昭探知玉黃樓有踞賊二三萬高縣敗賊將由羅家坳
合股劉嶽昭遂飭曾紀鳳等四營截擊以匪而自督大隊進剿賊
不能支擒斬及墜崖斃者屍相枕藉立將玉黃樓賊巢攻破追殺

數里餘賊向沙溪奔竄其橫江巨股意圖撲渡金沙江十一月初三日提督胡中和等約期進攻初六日諸軍分道揚隊賊已由回龍場蠡擁而來胡中和揮兵橫擊將賊衝爲兩起我軍分投襲勦斃賊三千餘名力破賊卡數十座直抵橫江場口復斃賊千餘名初七日胡中和等移營漸逼賊壘該逆乘我軍營盤未就突出三萬餘人分兩路來撲胡中和堅陣以待該逆漸近營次我軍奮勇迎擊賊遂敗走官軍分兩路追殺殲其悍黨二百餘人賊逸入卡胡中和復追至橫江場前斃賊無算十二日我軍分道進逼槍礮齊施賊奔入卡其尾隊竄走不及者被我軍殲斃三百餘名其西岸水過河之賊見我軍直抵橫江卡前意欲隔岸援救適總兵唐友耕等已帶隊由西岸馳至礮船亦溯流而進水過河賊巢復擁出數萬人將圍死拒唐友耕身先突陣親兵繼之立刺悍賊數十

名乘勢掩擊當將賊卡踏毀十餘座斃賊不計其數據逃出賊供
橫江賊首偽宰輔方元詳偽大經略賈逆皆中礮傷臣見飭諸軍
乘勝先將橫江賊巢攻克以孤其勢卽合圍雙龍場以圖石逆爲
埽穴擒渠之計至高縣知縣丁夏俊禦賊捐軀仰懇 天恩照同
知直隸州知州陣亡例議卹其壘次打仗陣亡之擬保參將何文
魁等均請飭部從優議卹又奏查川省軍情石逆前被各軍追勦
出境在黔無從擄食遂由畢節黔西竄入雲南鎮雄滇省糜爛旣
久伏莽甚多石逆所過地方散練遊匪隨處響應裹脅至十餘萬
賊勢倍於日前乃由筠連高縣回竄敘南分踞橫江汛水過河雙
龍場玉黃樓等處夾橫江而壘查橫江由雲南大關廳流入川境
自南而北至安邊與金沙江會該逆欲由橫江順流搶渡金沙復
分股蔓延滇境之副官村直達永善縣沿金沙江數百里處處窺

渡而安邊既當其衝上至屏山雷波江岸節節宜防幸各營楚勇
尙未遠調賊蹤甫至臣卽飛檄湘果軍馳赴敘府南岸以保郡城
檄果後全軍由慶符包鈔以扼其東竄調總兵唐友耕振武營駐
安邊適對橫江以遏其衝復派總兵熊煥章秦華祝各率所部分
駐屏山雷波會同地方文武兵團以防乘隙偷渡此時布置有備
各軍連獲勝仗賊氣已奪臣仍嚴催諸軍合力大舉以期掃穴擒
渠乃石逆狡計百出知屏雷以至安邊勢難撲渡復以中旗一股
由雲南鎮雄繞赴東川府地界沿途裹脅眾亦數萬圖窺甯遠府
屬臣因此刻分兵遠應須一月程途方能行抵甯遠儻該逆意有
牽掣訥知我兵前往復由東川回竄敘南是正墮其術中遂委道
員史致康等督率甯遠府知府李祐及地方文武調集漢土各練
沿金沙江上游星羅碁布嚴密設防韓超田興恕奏粵逆自遵義

等處敗後分竄畢節縣因該縣城守嚴緊並總兵李有恆援軍趕至匪眾悉向雲南鎮雄州竄去茲准四川督臣駱秉章咨會該逆在鎮雄州裹脅土匪其勢復張九月二十四五等日分股由焦村直撲筠連並上竄宜賓之橫江鎮意欲搶渡金沙江進窺敘郡見飭各營會剿咨由黔省派兵嚴扼黔西畢節一帶使賊不得竄逸等語臣等當飭李有恆仍督各軍駐紮畢節扼要嚴防又飭黔西畢節各州縣聯團守禦其竄撲郎岱廳城一股疊經團練轟擊該匪於十月初一夜分股逃遁一股竄永甯州屬之關嶺一股前隊竄至郎岱安南交界之毛口河後隊尙踞廳屬打鐵關地方並探聞該匪欲糾土匪復攻廳城期在必得時代理永甯州知州李崑先經臣等札飭帶練調團赴郎岱援應初一日馳至廳屬洒志地方遇賊接仗斃匪數十名初二日該匪已分竄關嶺李崑星夜帶

隊鈔出賊前迎頭堵剿初四日行抵北口地方李崑分派兩隊設伏山後親督一軍迎前誘敵該匪率眾出拒我軍佯敗該匪追過山坳伏兵齊出前後夾擊斃匪百餘名生擒十一名正法敗匪悉向毛口河奔竄李崑帶隊跟追署郎岱同知嚴謹署永安協副將雙祿於初二日帶團進攻打鐵關先調附近團丁堵截該匪旁竄之路又派楊萬年等帶兵練二千名策應嚴謹等親督練團分路進剿各軍奮勇搶入關口殺賊數百名生擒八十餘名正法該匪勢不能支遁歸毛口河賊巢嚴謹等整隊追剿初七日馳至毛口河與李崑一軍會合併力夾擊該匪悉數迎敵抵死抗拒適李有恆派赴郎岱援剿之葛樹本等各帶勁勇前來該匪畏怯紛竄搶船爭渡我軍乘勢掩殺斃賊五六百名其爭渡不及自行鳧水掩斃者無數餘匪悉數過河由安南邊界向雲南霑益州一路竄去

查石逆擁眾十餘萬由川竄黔分撲各府廳州縣城池勢甚猖獗幸屢經官軍擊敗未得逞志茲復在毛口河大受懲創惟石逆未獲殲擒實堪憤恨見在該匪等由霑益州一帶奔竄滇省與川境在在毗連滇中無可撈掠勢必仍行入川與由鎮雄竄川之匪合股肆擾川省兵力較厚諒不難掃滅狂氛臣等業已督飭黔邊各屬節節嚴堵以防回竄上諭石逆回竄敘南後復分股再陷高縣城池經駱秉章調派楚軍分投剿辦收復高縣並將王黃樓賊巢攻破賊膽已寒惟此股兇燄甚張蓄謀甚狡前經疊諭駱秉章迅飭劉蓉馳赴敘南督軍卽著責成該藩司將橫江雙龍場賊巢次第攻克毋任再竄滇黔又貽後患其繞竄甯遠之賊卽著飭令該地方文武調集漢土各練嚴密堵遏至石逆在滇餘股疊撲郎岱永甯各城均經擊敗該逆非回竄黔疆必圖入川省與前賊合

股著駱秉章韓超飭令沿邊一體嚴防勿任竄入郭逆自廣元分竄巴州儀隴經官軍痛創著駱秉章卽飭周達武各軍就地剪除不可但驅逐出境致令回竄陝疆至田興恕以獲咎之員朝廷飭令赴川交駱秉章差遣黜陟自有權衡乃韓超尙爲嘵嘵瀆請實屬膽玩已極所請將田興恕暫畱黔省之處著不准行仍著遵照屢次諭旨飭令該提督趕緊赴川聽候駱秉章調遣如再執意遷延必將韓超一併治罪懷之愼之將此由六百里各諭令知之○諭韓超查殺害教民一案因本年開州夾沙龍地方偏脅教人共祭龍燈傳教人文乃耳等不從經團眾擁至州署知州戴鹿芝見眾情洶洶恐致激變因將文乃耳等正法辦理錯誤已由四川委員宣維禮等稟請駱秉章等覈議具奏見將團民拏辦和約張貼宣維禮等已與該主教面議一切均無異言各立議單存案

不至再生枝節田興恕無陵辱教民之事卽戴鹿芝等之擅殺亦由於眾怒難拂不能歸咎於該提臣一人各等語韓超爲田興恕所脅將殺害教民一事盡諉罪於戴鹿芝且謂宣維禮等已與該主教面議均無異言乃據總理各國事務衙門咨送軍機處文內稱收到法國公使哥士耆交來鈔單所言貴州情形及百姓稟畱田興恕並無其事四川委員候補道宣姓並武官吉姓抵黔兩月並未來天主堂一次而貴陽府知府多文代爲主謀言此案非裝飾造作不能了事等情與本日韓超所奏大略相同似此情形焉能了結於人心公論均未能得其平且文乃耳實係洋人韓超飾詞具奏尤屬有心含混著崇實駱秉章卽行確切訪查該省見辦情形詳察具奏田興恕疊經中外參劾其驕淫之習跋扈之情早當從重治罪此次勞崇光張亮基到黔如該提督仍敢抗不赴川

卽著傳旨拏問審辦以爲抗違者戒○曾國藩奏金陵大營堅守如常北岸巢縣之賊掠至段家橋運漕之賊竄至湯家溝十一月二十四日賊撲近無爲州北門外我軍出隊堵剿金陵派援之劉連捷三營適至賊卽卻走蕭慶衍毛有銘兩軍亦於二十六七日趕至無爲州連日雨雪尙未開仗南岸楊岳斌水師於十九二十二等日在三汊河奪三板槍划二十餘號二十七日會同陸兵羅逢元等攻破護駕墩兩岸逆壘焚奪賊船二百餘號僞侍王在東壩招來之船不復能逞志矣周萬倬吳坤修兩軍於二十七日攻剿石碇等處踏毀兩卡四壘焚其輜重金柱關蕪湖兩路幸皆穩固甯國鮑超一軍於二十七日進攻馬頭楊柳鋪之賊大獲勝仗踏毀賊館賊卡甚多惜所募新勇未齊不能乘勝痛剿水陸糧路仍有梗塞之虞駐守涇縣之易開俊吳廷華等營二十六日擊賊

於晏公堂獲勝一次二十七日追賊於黃邨挫敗一次太平石埭
兩縣賊踞如故擾及陵陽鎮初五日竄入青陽縣城臣見檄調朱
品隆一軍移勦青陽縣城以顧涇縣後路未知能得手否報聞○
予四川陣亡知縣丁良俊參將何文魁江南陣亡知縣胡學詩副
將程自有等祭葬世職○予江南軍營病故提督黃慶等入祀昭
忠祠○以孫如僅爲內閣學士由翰林院侍讀學士遷○丁酉諭內閣五城
御史奏團防保甲告成將辦理情形及戶口人數開單呈覽並請
將司坊官首事紳董獎勵各摺片著准其擇尤保奏毋許冒濫惟
團防之法所以稽查奸宄弭盜安良誠恐日久懈生竟致有名無
實該司坊各官經此次俯准擇獎之後諒能激發天良不至疲玩
因循仍蹈從前積習該御史等仍當督飭司坊各官認真巡查嚴
密捕緝以清奸宄儻有奉行不力致令匪蹤潛匿釀成搶竊等案

卽著該城御史查明嚴參懲處○命兵部左侍郎崇厚幫同直隸
總督文煜辦理防剿事宜○予浙江陣亡總兵官繼興入祀昭忠
祠○僧格林沁國瑞奏臣等於十二月初六日仍督軍進攻韓樓
賊寨雖轟塌該寨房屋多間匪眾堅守如故查韓樓東十餘里夏
家橋地方捻首楊愚汰每值渦河以南各匪來援韓樓皆楊愚汰
接濟糧食該逆乃八卦黑旗積年巨捻應先除此患以絕賊援而
孤韓樓之勢初七日督軍進攻用炸礮轟擊寨內房屋延燒殆盡
旋有逆首楊愚汰之兄楊愚汶出寨乞降當令將逆首楊愚汰交
出始稱未在寨內追究詰至再則稱楊愚汰已被炸礮轟斃復究
圩中脅從則稱數日前星散大半見在蓄髮者無多情願歸正並
將楊愚汰屍身送出驗看查該逆旣已擊斃其餘被脅從匪者自
宜准其投誠惟楊愚汶係該逆胞兄雖經出圩乞降未便寬縱當

將正法梟示並將楊懋汰一併戮屍梟示以昭區別次日派侍衛
卓明阿帶隊督飭投誠各寨前往該處收集槍礮平毀賊圩以免
後患復據亳州知州稟報渦河南岸溜子集賊匪不時出寨滋擾
並阻我軍西路糧道初九日卽往攻剿該逆出圩抗拒經翼長蘇
克金帶領馬隊衝壓斃賊數十名並用炸礮轟擊然燒房屋數處
旋有該處投誠之勇曰雷彥聲稱溜子集捻首李傳珠盧照等有等
亦悔罪求撫察其情形尙屬出於至誠當令地方官分別安插是
日卽改攻韓樓該匪仍前抗拒復用炸礮轟擊房屋延燒淨盡該
逆雖拌死守牆然賊勢甚蹙料其必圖逃竄豫派翼長舒通額前
往堵禦逆首張平等果出南門向東南逃逸經舒通額督帶馬隊
衝擊該逆大亂我軍乘勝追殺擒斬多名十二日查驗圩中尙有
被偪良民老幼婦女三千餘名俱令各投別寨依親圩牆盡行平

毀毫境渦河北岸一帶惟馬村橋逆首立稜眼蘇添才尙敢抗拒
十三十四等日帶隊進攻該逆雖遣人懇請投誠而逆首不肯出
圩仍須設法攻剿至李城敗匪竄赴山東蘭費一帶經臣等飭催
營總富和帶領馬隊跟追會合德楞額之軍併力進剿十二月初
七日德楞額會同富和一軍由嶧縣行至蘭山境內卽有作子坊
前黎圩全山等圩賊匪一二千名出撲德楞額等帶隊分投衝殺
斃賊一百餘名臣等仍飭趕緊前進務將此股賊匪悉數殲除又
奏臣密派土人扮作商賈前往苗沛霖處查訪據回營報稱探得
苗沛霖曾有聲言豫備乾糧前往陝西之說復又中止此時並無
動靜十二月十二日臣接據苗沛霖稟稱紮營謝家溝口破谷家
等處賊圩將捻首鄭蘭等殺斃等情所稟無非遵照札飭攻剿捻
匪情形惟所稱粵逆大股擁出長江之患不知伊于胡底長淮之

防又不可稍疏不識如何布置等語審度其詞顯係注意長淮用
言嘗試希圖派其防守臣前以壽州正陽不可無兵駐紮臣相距
甚遠且無兵可分曾經奏請飭下署撫臣唐訓方酌量派兵駐守
以昭慎重今苗沛霖稟請布置臣再四籌酌惟有仍用羈縻之法
札飭勦捻立功其長淮之防自有該省督撫等籌辦庶於鈐制之
中仍寓籠絡之意譚廷襄奏查李城一股見回竄費縣之梁邱一
帶德楞額富和兩軍於十二月十二三等日在蘭曹交界之中村
磊石神山等處勦賊獲勝進抵蘭山黃國瑞一軍亦於十一日分
攻徐家蘆塘等圩與郟城縣知縣周士溥斬擒逆匪多名將徐家
圩立時攻破蘆塘圩亦卽收撫是東面有兵勦辦無虞竄逸上
諭議政王軍機大臣等捻首楊魁汰救援韓樓僧格林沁移師夏
橋進攻該圩楊魁汰被殲身死伊兄楊魁汶出寨乞降僧格林沁

准令被脅從匪人等投誠將楊魁汶梟示所辦甚是其溜子集擒
首李傳珠盧照有等被剿窮蹙情願悔罪歸誠效力贖罪僧格林
沁察其真心悔過飭令地方官分別安撫韓樓逆匪張平等竄逃
官軍將圩牆平毀見在渦河北岸僅有蘇添才一股尙敢抗拒官
軍僧格林沁剿撫兼施自不難蕩平捻眾惟該匪等野性未馴納
降太多地方官難於鈐束恐大軍一撤仍復相聚爲匪嗣後各圩
匪首有率眾求撫者僧格林沁務須詳加訪察如果誠心反正或
係被脅從匪自可貸其一死如係著名首匪屢與官軍打仗雖勢
蹙求降仍當翦除以杜後患至苗沛霖稟稱粵逆大股擁出長江
之患不知伊於胡底長淮之防又不可片刻稍疏請示如何布置
等語顯係注意長淮用言嘗試僧格林沁業已窺見其隱據議政
王等將該大臣咨到苗沛霖原稟及札飭文稿呈覽如飭令苗沛

霖鈴束練眾安分從戎力務農業不可苛派民間專以勦擒爲急務江淮之防自有督撫籌辦等語均能切中事機於絕其覬覦之中仍隱寓駕馭牢籠之意辦理甚爲得法惟壽州正陽不可無兵防守僧格林沁所稱鞭長莫及自係實情著曾國藩唐訓方仍遵前旨迅速酌派得力大員統帶兵勇前往正壽二城駐守此事關係長淮全局不可稍有疏虞致令前功盡棄本日又據譚廷襄奏李城等匪竄匿梁邱譚廷襄所派奎芳一隊已由費縣折回東面著僧格林沁仍嚴飭德楞額富和前進會同東省官軍將此股匪眾迅速殲除毋許再有延誤將此由六百里各諭令知之○諭譚廷襄奏勦辦淄川匪徒堅城未下請將貽誤之已革知府撤省查辦另派大員督攻及進勦教幅各匪會勦張錫珠股匪各摺片淄川劉德培股匪經譚廷襄派令吳載勦前往查辦該員不能乘其

滋事之初迅圖撲滅一味將就遷延希圖敷衍了事迫賊羽翼已成踞城戕官勾結外匪兇燄日熾吳載勦束手無策駐紮周村意存觀望種種貽誤實堪痛恨據畢道遠等聯名奏參該革員恒怯乖謬各款尤爲法所難容既經譚廷襄撤回查辦卽著督飭藩臬兩司按照畢道遠等原參各情逐款確訊審明後奏聞請旨已革遊擊謝炳等均著嚴切確查據實嚴參陳顯彝到淄後雖疊次進攻屢有斬擒蕞爾一城任聽逆匪久踞莫可如何察其情形亦難得力見經改派曾逢年前往接辦務須飭令該總兵振刷精神迅下堅城毋令久駐其陳顯彝一員著譚廷襄察看如稍不得力卽行撤回不准在淄逗畱李城等匪竄匿梁邱蘭費一帶羣匪如毛難保不勾結奔突德榜額富和黃國瑞等軍均已到齊卽著督飭派出各軍並地力文武會同四面兜剿務期實力擒捕盡殲醜類

教匪屢次出擾飽載回巢費泗一路旣撥郭大勝帶勇馳勦西南一帶亦須防其竄擾著嚴飭在防兵勇扼要堵勦毋令乘虛出掠是爲至要張錫珠一股因直隸兵力較厚又復回竄東境已飭文煜遮克敦布等跟蹤追勦卽著譚廷襄飭令常存文英等合兵兜擊一股殲除毋任乘間脫逃致滋延蔓至宋憬詩帶領降眾由陝渡河入晉前據英桂奏派兵攔截能否追及尙未據該撫續報並著譚廷襄嚴密訪查如宋憬詩潛回東省卽著迅速具奏仍一面調派得力員弁設法擒獲毋令竄匿將此由六百里諭令知之○諭毛昶熙奏官軍攻克蕭王寨等處賊圩勦辦那集擒匪大勝一摺捻首陳大浩竄踞蕭王寨已成檻獸釜魚之勢官軍果能實力兜圍何難一鼓殲滅乃縱令鋌而走險襲踞信隨交界之雷鼓臺復在草店小林店等處四出燒搶不知毛昶熙所司何事可見摺

內所云面授機宜不過紙上鋪張之說李續燾等勦捕此股匪徒並不嚴密堵遏致首惡稽誅餘氛復熾實屬疏縱張之萬計日可抵汝南蓄會合毛昶熙督飭張曜迅速跟蹤追勦務將雷鼓臺攻拔悉殲醜類李續燾一軍近在長台關並著張之萬等恪遵前旨派令該總兵督軍追勦並令地方文武紳團隨處堵截儻敢遷延不進致令陳大禧再有他竄惟李續燾是問該逆竄入隨州境內並與巨捻林振山勾結著官文嚴樹森迅派兵勇迎頭截擊毋令一盡之匪得容殘喘致成燎原是爲至要本日據僧格林沁奏遵查吳正誼無可安置已交原解官押回豫省由張之萬酌覈辦理等語吳正誼旣據僧格林沁察看營中無可安置自未便卽令回籍著張之萬酌畱豫省妥爲駕馭毋稍疏忽將此由六百里各諭令知之○諭官文奏陳逆由二竹竄擾平利見在勦辦情形一摺

據稱該逆竄入陝西之平利其後隊梁逆等尙在竹谿請飭四川
由大甯派兵陝西由興漢派兵三面夾擊各等語此股皖逆本係
陳玉城餘黨因無巢可歸游弋於楚豫之交將來與石逆相似必
爲川陝楚三省邊防之患不可不迅圖剿除前因瑛棨奏聞曾諭
官文等嚴飭梁作楫等就地殲除見在梁作楫是否趕到賊眾究
趨何處毛震壽所派之兵已否前往著瑛棨迅催該藩司調撥多
隆阿剿辦回匪正當得手若任此股闖入興安必致於剿回事宜
轉多掣肘著該大臣添派勁旅迅速馳剿並著駱秉章酌撥數營
與楚陝之軍三面夾擊永除後患見在川陝兩省逆氛官文等斷
不可盡委之鄰省致令賊勢蔓延務飭梁作楫等越境追剿且設
法繞出賊前迎擊期於盡殲不令旁竄將此由六百里各諭令知
之○諭洪毓琛奏斗六失陷嘉義喫緊見辦情形一摺斗六爲嘉

彰聯界之所既已失陷非力固嘉義則郡城岌岌可危所關非輕前據徐宗幹奏已飭吳鴻源統帶各軍渡臺援剿嘉義曾玉明一軍保守鹿港專顧北路惟此時嘉義尤形喫緊且郡城精銳兵勇悉皆調歸林向榮部下自敗挫後兵勇散亡刻下援嘉之師非厚集兵力不足埽蕩逆氛曾玉明素習戰陣著卽迅飭該總兵督率所部節節進剿並迅催吳鴻源統帶諸軍前進會合夾擊保全嘉義進攻彰化肅清臺境毋許稽延時日逆黨林慝成踞守彰城欲牽掣曾玉明兵勇則鹿港亦須兼顧並著飭令該總兵等分撥兵勇嚴爲扼剿該督等務當振刷精神嚴飭各軍速殲逆氛不得稍有貽誤致令匪勢蔓延自干咎戾洪毓琛近在郡城一切守禦事宜及各營派兵籌餉尤宜悉心籌辦此時斗六旣陷彰化未復道路恐致中阻所需糧餉軍火仍著設法由海道運往接濟將此由

六百里諭知耆齡徐宗幹並傳諭毓琛知之○復福建陣亡已革總兵官林向榮職並副將王國忠等均予祭葬世職○己亥諭議政王軍機大臣等熙麟奏密陳陝甘軍務情形一摺所陳各情均係遠慮深思通籌全局不爲無見惟陝省逆回倡亂必得多隆阿大張撻伐以後辦理方有端緒而此勦彼竄甘省首當其衝其界連陝省各州縣均有蠢蠢欲動之意該督旣知其難愼勉爲之必能不負寄託著卽仍遵前旨俟道路稍通卽行馳赴新任其毋庸固辭至官文總督兩湖見在籌策東征調撥兵將關繫東南數省之安危張之萬前任豫省學政素得士民之心不得已命其前往該省權篆巡撫以資整頓之二臣者人與地均極相需一時驟難更調想亦係該督急於薦賢自代而未暇計及至所稱多隆阿長於武備而短於文事恐受左右之累且嫉惡太嚴賊平後恐爲宵

小所動搖具見該督愛才之深急思護惜而成全之嗣後朝廷於多隆阿軍營諸事惟有加意訪察並時加訓誡俾不再蹈勝保之覆轍庶無負朝廷委任之初心原摺一件著畱中將此由六百里密諭知之○諭熙麟奏遵旨查鈔勝保寄頓潼關貲財一摺另片奏請將黃得魁部勇畱標錄用各等語此次熙麟將勝保寄存潼關貲財全行鈔出卽著按照單開各件並鈔出贏馬一併送交多隆阿軍營估變錢文頒賜將士不得任意遷延致負朝廷體恤戎行之意黃得魁打仗尙屬奮勇准其畱營由熙麟帶赴甘肅差委其所部壯勇卽著酌量遣畱一併隨帶赴甘以資得力將此由五百里諭令知之○庚子諭議政王軍機大臣等英桂奏宋憬詩不受羈縻已由北大路帶勇前進譚廷襄奏降眾越晉赴直見已飭屬嚴防各一摺昨因文煜奏准山西巡撫函稱宋憬詩已率眾過

平陽府聲言由北大路出獲鹿直達山東文煜已派知府徐鏞等
前赴井陘令其呈繳馬匹軍械當經諭令添派明幹道員同往辦
理或畱營效力或散遣歸農如不遵約束滋生事端卽令成保勦
除如由潞澤繞赴豫境卽由張之萬督飭楊長春等偵探備豫本
日據譚廷襄奏約計二十日後可抵直境如出山而南則由正定
趙州以至清河棗強可至臨清該處與張錫珠股匪逼近萬一聯
合爲患滋甚出山而東則可達河間景德一帶衝途驛路尤關緊
要著文煜仍遵前日諭旨飛飭成保等妥速辦理如其竄回東省
卽著譚廷襄設法羈縻毋令回巢後句結爲患若因直境有備復
行回竄並著張之萬英桂嚴飭所屬加意防範譚廷襄另片奏教
匪出竄勦擊獲勝仍令會合進兵等語蘭嶧一帶匪圍甚多德楞
額甫經獲勝何以撤隊回嶧著飭令該革員等乘勝進勦毋稍觀

望譚廷襄奏請將署參將鳳岡革職一片已照請批准鳳岡果素有骸疾何以派令帶兵該撫於某人之能否勝任若罔聞知殊形憤憤著嚴飭改派之春祺隨同曾逢年將淄川一股迅速掃蕩克復城池不准再有延宕英桂另片奏請飭湖北派員參贊陝西軍務一摺著畱中備覽正在寄諭間文煜馳奏連日追擊賊勢窮蹙石贊清奏宋憬詩領隊北竄遣員迎前開導各一摺賊往永年西南竄逸係邯鄲磁州地方文煜已飭孫治取道鉅鹿順德進兵兼防北竄著卽督令會合東豫兵團併力兜剿宋憬詩帶領馬步千名由山西徐溝入獲鹿境著文煜與石贊清飭令所派徐鏞候補知府沈鎔等各員弁迎前開導或能束身歸罪剿賊自效如果狼子野心不遵理論卽仍遵前旨飭令總兵崇福知府文梁等迅卽剿除成保薩薩布所帶京兵務須合爲一起卽由保定府前行迎

往固關一路相機進取若宋憬詩不至滋事此兵仍卽徑赴文煜
行營扼要防勦不得株守保陽將此由六百里諭知文煜譚廷襄
張之萬英桂並傳諭石贊清知之○諭有人奏臬司孫治帶兵南
下並不馳赴冀州竟赴大名一路觀望逗留繼而敗退威縣該督
復爲掩飾等語著文煜將孫治潰散情形詳細查明據實迅速具
奏不准一字欺飾將此諭令知之○駱秉章奏髮逆僞扶王僞銳
王僞曾王僞齊王等擁馬步數萬已由湖北鄖陽竹谿竄至陝西
平利偏近川界臣度該逆蹤迹由豫而楚而陝必聞石逆見踞蜀
境遂冀入川合夥查夔郡之大甯綏定之城口太平以及保甯之
通江廣元上下二千餘里與楚之鄖西陝之漢南在在毗連此卽
從前三省教匪往來熟道山徑叢雜路出如梳見在重兵皆在敘
南攻勦石逆正值喫緊萬難抽撥而川北營勇不滿六千實覺不

數分布臣先其所急已飭護軍嚮導兩營馳赴城口太平擇要堵禦並檄武字營扼紫綬定保甯兩府適中之地以備雕剿而資策應陝西巡撫瑛稟奏據興安府知府林映棠稟稱十月十九至二十一等日髮逆竄至興安據盤獲奸細供稱偽齊王見踞竹谿偽曾王偽東王在平利安康一帶來犯郡城者係偽扶王共有十餘萬人人心惶懼請撥兵救援等語當咨多隆阿迅撥勁兵前往剿辦惟見值多隆阿勝保新舊交替之際諸務紛繁恐一時未能策應臣一面飛咨四川兩湖督臣撥兵會剿一面嚴飭各該地方文武妥爲布置將隘口全行堵截扼賊旁竄之路俟援師到後再行痛殄逆氛上諭瑛稟奏興安被圍及毛震壽兵勇潰敗飭令盧又熊等分路接剿獲勝並解漢中之圍等語據稱曹逆一股竄踞興安府之恆口趨撲府城先後擊退盤獲賊供偽齊王見踞竹谿

僞曾王僞東王在平利洛河等處僞扶王來犯郡城鎮府兩城兵
勇單薄情形正屬可虞又毛震壽所部各營爲洋縣之賊潛出撲
襲毛震壽收集散亡飭令陳天柱盧又熊易佩紳等分路接勦疊
有斬擒盧又熊之軍並將竄撲漢中之賊擊走立解城圍此股髮
逆本陳玉城餘黨見在竄擾爲川陝楚三省毗連之地山徑叢雜
偏近老林從前川楚教匪卽於此處肆擾有年此時若不迅卽刻
除一經蔓延勦辦更必棘手駱秉章旣已派兵由太平城口一路
進勦仍著該督添派勁旅迅速越境務期就地殲除毋令賊得入
山踞險及與洋縣之賊勾結或乘間入川串合石逆匪黨是爲至
要漢中軍務毛震壽督辦日久無功此時賊燄更張毛震壽所部
遊擊王其發等營盤爲賊所襲是否確實著駱秉章多隆阿均遵
前旨速將飭查毛震壽各款查明據實覆奏如果不能得力卽由

多隆阿遽委大員前往接替將毛震壽撤參母令久延更滋貽誤
陝省軍務喫緊多隆阿與雷正綰之軍分路進剿陝南亦須兼顧
該將軍一人籌辦必期萬全若能參贊有人更可相資爲理前次
官文等雖經遵旨續派數員但官職較小恐呼應不靈著官文等
再行悉心選擇明幹穩練諳習戎機能與多隆阿相爲一氣之大
員奏明派往多隆阿軍營參贊陝西軍務副將盧又熊曾有縱勇
擾民冒功放恣情弊前經諭令駱秉章查明具奏此次瑛棨稱該
員力解漢中之圍仍著駱秉章遵奉前旨將飭查盧又熊各情迅
速覆奏英桂奏晉疆四面籌防兵勇仍虞單薄請飭官文等仍行
添募湘勇二千名派員管帶赴晉等語著官文等咨商毛鴻賓如
能添募卽照所請辦理瑛棨另片奏均悉所有鈔出勝保省寓物
件一併移交多隆阿軍營變價以充兵賞將此由六百里各諭令

知之○調文格爲廣東布政使以憚世臨爲湖南布政使

由岳常
禮道遷

○予陝西陣亡遊擊魏士襄等祭葬世職○辛丑諭議政王軍機大臣等崇厚奏遵旨起程一摺畿輔地方緊要崇厚業已起程著即迅速前往幫同文煜辦理防剿事宜一經到營即行馳奏未悞詩狼子野心若畱之直隸或縱往山東終爲異日之患該降眾如尙馴順安靜則不妨暫與羈縻仍須隨時防範儻不遵鈐束即著知照成保薩薩布等軍圍而擊之盡殲醜類以除後患此事若令文煜辦理恐其拘泥貽誤崇厚向來辦事明決著即責成相機安速辦理有人奏遮克敦布於張錫珠聚眾滋事僅委參將帶兵前往並全調秦聚奎馬勇擁以自衛致該道兵單遇害性耽安逸日以鬪鴉爲樂知縣李鴻垣把持營務濫收降眾殺害良民遮克敦布甘爲所欺等語著崇厚按所參各情確切查明據實參奏原片

著鈔給閱看參將王恩第前經文煜劾其通賊貽誤著崇厚迅卽提訊如果屬實卽一面正法一面奏聞將此由六百里諭令知之○李鴻章奏據水師遊擊周興隆稟稱僞職錢桂芒駱國忠董正勤等由常熟縣城專人來營諄求投誠獻城並約太倉僞佐將錢壽芒同時舉事臣卽傳諭該僞職等約期內應並察知永昌練首候選道徐佩瑗與該僞職等合謀已久札飭調齊練勇協力妥辦嗣經周興隆遵飭改裝入城密定於十二月初一日常昭舉事卽約會官兵分攻太倉與錢壽芒相應昨據周興隆駱國忠稟稱僞忠王李秀城忽於十一月二十二日由金陵回至蘇州錢桂芒心生畏憚已託詞往蘇恐有反覆不及待初一日之期商定先期在常昭舉發遂於二十八日黃昏駱國忠設法演戲就席砍殺僞憑天安錢加芒僞逮天福姚得時卽率所部圍剿各館逆眾時董正

勤等各誘殺諸巨酋合兵夜接梗頑賊眾殺戮幾盡黎明周興隆
駱國忠等督令合城薙髮派奮勇萬人分守四門及水陸來路以
防蘇賊並令余拔羣潘金旺分率礮船陸隊潛會福山偽職胡經
元江勝海等合勦廣逆比至則賊營固守無隙可乘周興隆駱國
忠於二十九日率勇夜抵福山令潘金旺駱國孝仍攻賊之南周
興隆駱國忠鈔過北面斷賊登舟之路並伏百人於江口湍下天
色將曙槍礮雷發余拔羣亦於江中開礮攻擊賊漸不支僞主將
粵逆侯得龍立於船頭被駱國忠手然洋槍擊倒賊船潰亂駱國
忠等揮眾齊發火箭焚毀逆艇數隻其餘竄逸大江西北者十數
船僞近天福謝有城倉皇欲走胡經元從背後殪之江勝海乘勢
砍殺小頭目數十名並率眾從內殺出駱國孝跳越兩濠手刃悍
逆數名毀牆而入潘金旺周興隆分從南北殺進粵逆死黨無一

脫者並生擒五十餘人許浦白茅徐六涇各海口賊營皆爲我有此十一月二十八九日十二月初一日收復常熟昭文縣城並攻克福山要口之情形也贛南鎮總兵程學啟知縣李鶴章遵飭先於潘鎮鋪望仙橋等處派隊堵扼牽綴賊自率親兵直至太倉五里墩渡河毀卡進至南馬頭賊憑河立營抗拒程學啟等揮兵對敵卽時趕造木筏率驍勇渡河踏毀土營四座賊敗退入城我軍偪至城根賊堅伏不出是日周興隆所派之董正勤吳超凡帶勇千人前抵太倉支塘鎮遇伏苦戰受傷退回僞主將錢壽桂在太倉知事機已洩率所部二千人於初七日至營投見臣暫安插其眾於黃渡是否可用仍須察看分別遣畱此初一日進攻太倉獲勝未能如約會齊之原委也徐佩瑗不知忠逆之歸也先入蘇城將密有所約忠逆至蘇疑而拘之該團局船勇聞信分伺賊之

援常昭者中路擊敗之賊復改道援常惟常昭新附眾心未定又爲蘇州門戶忠賊必挾全力以相爭勢頗危險臣軍分守嘉定青浦各要隘中阻崑太兩城與常熟相隔甚遠陸路無從救應又未便以孤軍深入棄松滬於不顧但據周興隆駱國忠稟報城內米糧頗足沿海一面尚可通行臣已用礮船解濟軍火飛調福山鎮總兵鞠耀乾率所部師船會同副將黃登第師艇五隻駛泊徐六涇口飭千總袁光政將周興隆所部船隻帶赴常熟互爲聲援並委知州吳毓芬前赴常昭福山一帶察看情形撫馭降眾固結其心如援賊暫未調齊城內不生他變周興隆等或可支持一兩月以待臣新軍之至先是六七月間臣屢派員弁赴皖北招募十營嗣因上游緊急曾國藩截留張樹聲等五營守蕪湖旋調守無爲州又畱吳長慶等四營守廬州如皖事稍鬆明年正二月可以抵

泥臣處兵力漸厚卽當相機進圖崑太以通常昭之氣如新軍未至以前忠逆糾合上下游賊眾圍攻常昭必分股出崑山撲我前敵各營以圖牽掣臣縱不能遠救常昭亦當會合各軍竭力堵剿以遏賊援之勢遊擊周興隆與降將駱國忠等於四面賊區之中奮勇舉事力誅賊酋黨眾多人收復城池復乘勢攻克福山要口將連年出江肆掠之廣逆誅戮殆盡實屬膽氣過人惟臣處兵力過單無法往救不知該遊擊等能否保守未敢遽爲請獎應由臣酌覈勞績暫假虛銜軍功頂戴以資籠絡果其力卻援賊始終不渝再查明在事出力人員懇恩優予獎勵 上諭此次僞職駱國忠等於四面賊區之中竟能束身歸正殺賊殲渠收復各城連克要隘實屬奮勇出力李鴻章暫假虛銜以示羈縻著仍將該降眾等妥爲籠絡並傳旨嘉獎惟常昭爲蘇州門戶賊所必爭且與上

海中阻崑太兩城聲勢隔絕儻官軍不爲援應恐孤懸一城致復疏虞更恐該降眾等未能支持又生他變李鴻章已飭總兵鞠耀乾等統率師船駛泊徐六涇口並將周興隆所部船隻派赴常熟卽著飭該總兵等聯絡策應互爲聲援以期穩固其崑太二城李鴻章務當力圖進取儻能克復一城則陸路聲息相通援剿自易庶不至旋得旋失又棄前功方爲妥善其駱國忠等畱守常熟之萬人可卽傳令出隊幾成與官軍夾攻以剿爲防城內米糧雖足該撫仍須設法由海道接濟以固其心至福山賊船竄逸大江西北者十餘號究竟駛往何處著都興阿富明阿等密爲偵探迎頭截擊並著曾國藩飭知李世忠於江北駐守各城嚴密防範練首徐佩瑗已爲蘇賊所拘其爲人向來如何及錢壽仁旣率眾來投有無密謀可圖太倉均著李鴻章隨時續奏至常勝軍不遵調遣

流弊滋多李鴻章此次與外國增定條約裁汰常勝軍爲三千人
刪除冗費各勇口糧由中國派員經管松城內外地方事宜外國
管帶官不得干預並不准私購軍火懲辦諸勇悉聽中國會帶官
主意各條約均能斟酌盡善從此漸收兵柄一切可由中國主持
庶無尾大不掉之患惟白齊文以劫餉毆官之犯自應按照中國
軍法懲辦見經英國提督士迪佛立押解來滬由英國兵船看管
並未交出並藉口華爾白齊文先後託買軍火帳未算清請由中
國派員會算顯係藉詞拖延希圖寢事情殊狡展已諭總理各國
事務衙門照會駐京公使妥爲剖辯仍著李鴻章飭將白齊文迅
速交出毋得任意含糊了事將此由六百里各諭令知之○諭張
之萬奏陳大禧股匪回竄桐柏縣境見辦情形並攻拔藍靑店各
摺片陳大禧一股經楚省官兵擊敗竄回豫省桐柏境內見又竄

至南陽府屬地方非速行剪滅勢將益致蔓延張之萬見飭南陽文武分督兵練防剿西北兩路並令李續燾酌分數營與張曜所派馬隊由東南兩路會剿爲四面兜圍之計著卽嚴飭在事文武迅將陳大澐一股殄盡並將該逆首就地殲擒不准再令逃逸楚省官兵與豫軍同辦一事不得稍分畛域畫疆自守官文嚴樹森務當飭令總兵沈俊德督率所部越境會剿以期早殄賊氛儻賊由何路竄出卽惟何路帶兵官是問張之萬十三日在朱仙鎮發報十七日尙在許州五日之間行走二百餘里實屬遲滯著卽迅赴汝郡與毛昶熙會合籌商妥爲調度藍青各寨攻克情形昨已據毛昶熙奏及與該撫所奏大略相同著張之萬毛昶熙飭令余際昌乘銳力克張鳳林老巢殲擒巨憝毋再延緩前經諭令張之萬毛昶熙將汝甯信陽光州一帶賊寨民圩並官軍營盤地名形

勢兵練名數及賊匪數目詳細繪圖貼說具陳見尙未接覆奏著
卽遵照前旨迅將該省地勢賊情繪圖呈覽將此由六百里各諭
令知之○諭劉長佑奏廣西賊匪各股情形及交代潯州軍務起
程赴任日期貴縣各軍分路進剿及橫州兼辦剿撫各一摺晏端
書奏克復西甯並高州剿匪各摺片西甯縣城克復各鄉踞匪尙
多首逆張萍洸六尙未擒戮如果遁回蒼梧老巢卽應會合東西
兩省兵團併力兜擊蓮塘張高友一股見經楚粵各軍會同剿撫
兼施將次戡事潯州黃逆敗回貴縣其勢已蹙其黨多離卽橫州
梁漢股匪敗回貴州其被脅各村落亦皆悔罪投誠著張凱嵩卽
飭劉坤一趕緊赴潯督率鄭金華等各軍進剿登龍橋等處老巢
規復貴縣肅清地方並飭易元泰等會合楚軍悉聽江忠義指揮
務將蓮塘積年巨匪併力攻克毋再遷延粵西賊勢以平潯兩處

爲尤重如張逆除則平樂無事而桂梧兩郡可臻安謐黃逆除則潯州無事而黔鬱兩江可望肅清此外如容縣之范亞音南甯之孫仁廣永康之吳淩雲等再能以次埽除其餘各屬土匪打草刦寨者當可不撲自滅張凱嵩由州縣數年之間簡膺疆寄當如何矢心忠赤督同劉坤一奮力圖功以副委任本日復將江忠義簡署廣西提督該員計已行抵粵省所部各軍越境剿賊尙稱得力見在責無旁貸更必所向有功迅將蓮塘攻克並可移師東下會同劉坤一埽除潯匪及聯合東省官軍廓清兩粵以收全功也陳金缸股匪竄陷信宜尙稽克復既據晏端書奏係石骨大井兩大賊壘負隅之故著卽設法破其要隘迅督卓興方耀等軍奮力進攻將此由六百里各諭令知之○廣江西南城縣學額七名上饒二名○予浙江殉難在籍主事鍾世耀江蘇被戕遊擊曾繼榮殉

難知府高倬等祭葬世職○壬寅諭議政王軍機大臣等石贊清奏探悉宋憬詩由獲鹿向東南竄走情形一摺前據英桂奏常海在南城縣追及宋憬詩面加開導宋憬詩聲稱歸志甚切若准其回籍省親必可再圖報效該革弁入直境後不少停留其爲急欲回籍無疑如沿途並無騷擾該降眾尙未遽萌叛志著文煜崇厚設法招徠令其勦張錫珠以自贖如業已回籍安靜無事卽著譚廷襄飭令地方官曉以大義令其殺賊立功最爲妥善張錫珠竄至邯鄲境內據石贊清奏文煜已馳赴邢臺督勦自可遏其北竄著卽嚴催成保薩薩布迅督馬隊會同文煜所部盡力勦洗崇厚前已啟程並著星速前赴順德與文煜會商妥辦該匪被勦情急勢必拌死竄突晉豫邊界著張之萬速飭河北鎮道及派往之副將楊長春等督兵迎勦毋令闖入彰懷境內致勦辦重煩兵力晉

省之遼州潞安府所屬多與直隸毗連昨據英桂奏調派臬司王榕吉駐紮平定州檄飭運司鍾秀赴潞安府一帶防剿著飭令該二員督率在防兵勇激勵民練鄉團加意守禦以杜竄越而保完善將此由六百里各諭令知之○諭多隆阿奏統籌剿辦情形並收復涇陽各摺片又熙麟奏遵旨與馬德昭繞道赴甘一摺多隆阿由同州進兵自應先勦王閣村老巢以爲節節進剿之計見在西安城外二十里內已無賊蹤而旗綠各營尙多該大臣注意東路省城未能分兵防守尙係實在情形所有西安防守事宜卽著責成穆騰阿瑛棨認真防剿雷正綰所部兵勇不下萬名此時西路回匪援救同州勢近空虛卽著該提督率同成祿等相機攻剿直擣巢穴使回逆不暇救援則漸次可期得手多隆阿進剿王閣村何時可期剋復西安爲根本重地該大臣督辦全陝軍務亦不

可因有穆騰阿等防守竟置之不問儻省城稍有疏虞穆騰阿固爲軍法所不宥而該大臣亦何以副秦民之望仍著隨時兼顧毋稍大意宋憬詩擅自東歸該大臣既未能防範於先又不及追回於後北路空虛既無得力之將又無精銳之師該大臣豈未深知而任聽宋憬詩東歸籌畫殊欠周密萬一句結土匪爲患豈不牽掣該大臣兵力嗣後務當於勇往之中寓謹慎之意方足膺茲鉅任顧全大局甘省回匪情形見在尙未稍鬆馬德昭自應迅卽前進見在平利股匪甚爲猖獗馬德昭著卽由平利一帶進剿俟此股擊退陝南無虞再赴甘省熙麟著仍遵前旨先行帶同黃得魁繞道赴任督同恩麟等妥爲辦理瑛棨奏漢南剿賊獲勝一摺既稱殺賊無數生擒至一千七百名之多見在究竄何處該撫於此等緊要之處全不留心見在如何攻剿無一語提及不知所司何

事其隴州知州邵輔勦匪陣亡一片亦未將回匪由何處竄入戕官後又竄何處詳細聲敘封疆大吏奏報軍情不及一探報之尙有條緒何至喪魂失魄若此著卽查明迅速具奏該撫於多隆阿月餉則悉數委之湖北而於勝保舊部月餉則又委之直隸等省該撫竟可置之不問有是理乎本日雖照瑛榮所請諭令各省按月籌撥仍著瑛榮隨時接濟儻各營或有缺乏必將該撫藩從重治罪勝保所部兵勇經多隆阿裁汰以後實存若干名數著多隆阿查明具奏以資勻撥而歸覈實將此由六百里各諭令知之○諭前因貴州教民案件尙未辦結諭令勞崇光迅赴黔省會同查辦茲據該前督奏稱業於十一月十四日交篆定於二十四日起程取道湖南馳赴貴州等語湖南至黔驛路一律疏通卽著勞崇光兼程前進張亮基前已有旨令署貴州巡撫勞崇光到黔張亮

基必已先到並著商同辦理務須遵照疊奉諭旨斟酌得宜總期於明年二月內辦結是爲至要至崇實並未赴黔勞崇光到後卽當先後秉公查辦一面與該將軍等迅速面商覆奏劉長佑已令來京晏端書暫護督撫兩篆勢難兼顧黃贊湯由京起程已逾三月何以尙未到省此時行抵何處卽著趕緊進行馳赴廣東省城接受撫篆以重地方而專責成不准稍有遲延將此由六百里各諭令知之○予陝西陣亡知州邵輔祭葬世職建祠山東陣亡典史林介臣祭葬世職○癸卯諭議政王軍機大臣等見在上海通商事務已漸形簡少本日明降諭旨令薛煥來京其欽差大臣關防交李鴻章暫行接署薛煥接奉此旨如能由海道行走較爲迅捷著卽酌量情形迅速來京毋稍遲緩該大臣任內未經辦竣事件卽詳細告知李鴻章妥爲接辦該撫到滬已久於中外情形亦

能諳練著暫行督同署藩司劉邵膏道員黃芳悉心經理斷不可存五日京兆之心稍存推諉將此由四百里各諭令知之○命薛煥來京以江蘇巡撫李鴻章暫署辦理通商事務欽差大臣○甲辰諭內閣直隸地方降賊張錫珠等滋擾由南宮冀州以至新河威縣棗強束鹿等州縣境肆行焚掠疊次諭令文煜遮克敦布督率各帶兵勇文武及地方官吏迅速剿辦並令直隸按察使孫治出省帶兵乃該督等並不能確探賊情認真督剿於各屬地被擾情形意存諱飾惟據各營捏報之詞率行入奏曾經將文煜遮克敦布交部議處以示薄懲並嚴加訓飭冀其激發天良奮勉圖功以爲自贖地步月餘以來賊仍在順廣所屬等處游駛滋擾且自道員秦聚奎陣亡後逆燄更張而該督等屢奏賊竄山東境地直屬肅清又於所屬賊到之處捏報戰功任令地方蹂躪疊經中外

臣工李鴻藻潘祖蔭張之萬及御史孟傳金等奏參督臣昏庸臬司觀望遮克敦布始終玩誤各情本日復據御史裘德俊奏請將誤事各員嚴懲並鈔錄所得鄉人信函呈覽畿輔地方緊要若再任聽該督等坐誤以至匪黨窺伺出沒靡常其患伊於胡底直隸總督文煜於地方軍務漫不經心遷延貽誤闕冗不職著革職發往軍臺效力贖罪正白旗漢軍副都統遮克敦布以帶兵大員不能勦賊性耽安逸致令賊匪縱橫肆擾已屬疲懦無能且此股降眾人數無多皆遮克敦布辦理不善所致厥咎較重著革職發往新疆效力贖罪孫治所至逗畱帶兵出省一月有餘未聞與賊接仗避賊而行巧滑已極著革職以爲玩誤地方軍務者戒○諭議政王軍機大臣等前因文煜辦理張錫珠股匪不能得力諭令崇厚馳往軍營幫同辦理本日復因文煜顛預粉飾奏報軍情毫不

足時已將該督革職發往軍臺復將劉長佑調補直隸總督未到任以前令崇厚暫行署理崇厚業已起程著卽兼程馳抵邢臺接篆任事卽行督帶文煜所部並由天津調往兵勇將此股賊匪四面兜剿畿輔重地必應及早肅清該署督務當以文煜等爲前車之鑒將軍務迅速辦結勿稍稍延至軍務地方必須事事求實不准粉飾遷就並不准瞻徇情面以副委任祝壇見已到直所有遮克敦布部下兵勇卽著該署道暫行統帶本日已諭令寶山迅速馳赴該處接統此軍此股賊匪均係乘騎飄忽靡定崇厚卽催成保薩薩布所帶京營馬隊星馳前往合力奮剿以期得力王恩第通賊情形李鴻塤把持營務均著崇厚遵照前旨迅行審明分別正法懲辦伊綿阿縱兵搶掠到處逗畱前已有旨將該員革職交文煜審辦著崇厚卽將該員被參各款嚴切訊明具奏前任浙江

提督鄭魁士戰功素著打仗頗能勇往見在宣化府原籍屢次起用均以病辭著崇厚傳知該員如精力尚可支持卽前赴該署督軍營帶兵剿賊不准藉病推諉正在寄諭閒續據文煜奏賊由永年竄至邯鄲等處著崇厚督率兵勇實力堵剿毋任他竄並著張之萬嚴飭楊長春等迎頭堵擊一面激勵鄉團隨地截剿毋令闖入邊境嗣後直隸河南各州縣牧令稟報軍情該署督撫當嚴加整飭務須偵探明確不得任令捏報致誤戎機宋憬詩行抵獲鹿經千總劉世忠開導情願投營殺賊立功並請給假十日回籍省親該降眾一路行走尙屬安靜文煜所奏各情是否確實宋憬詩是否真心就撫仍著崇厚察看酌量妥辦張錫珠股匪本日譚廷襄奏稱見在臨清館陶文煜則稱在邯鄲沙河是否係一股綿亘兩省抑係分股託名著崇厚查明具奏鉅鹿縣于姓有人奏稱勇

於打仗爲賊畏懼著崇厚查明係屬何名令其帶團剿賊有功卽予保獎勿令湮沒有人奏張錫珠已被田家莊鄉勇擒殺是否屬實著崇厚一併確查具奏本日又據遮克敦布奏報賊竄館陶被追分東西兩路逃竄東股在李家莊撲除幾盡西股已至邯鄲之楊家莊見在勦辦各情遮克敦布見由威縣馳往曲周該處與大名相距甚近著崇厚卽飭祝塏迅卽前往暫行統帶遮克敦布所部之軍責成趕緊督率進勦遮克敦布所奏如果屬實務卽激勵諸軍乘勢速將敗殘餘黨奮力埽除淨盡俟寶山到日再將遮克敦布各軍交其統帶莘縣信兒莊另股匪徒滋擾遮克敦布摺內又有李家莊獲賊供稱匪首張玉懷先行改裝逃赴莘縣張錫珠楊四並無實在下落等語究竟所稱東股在李家莊勦除殆盡有無捏飾莘縣之賊是否卽係張玉懷等潛行竄往抑或與該處另

股相爲句串均著崇厚速卽知照譚廷襄飭署曹州鎮總兵常存等認真剿除據實奏聞毋許稍存欺飾將此由六百里諭知崇厚張之萬並傳諭祝壇知之○諭前已寄諭劉長佑趕緊來京卽由海道行走以期迅速見因直隸地方軍務未竣業將文煜等分別治罪劉長佑補授直隸總督劉長佑接奉前旨諒必能剋日起程並著於舊部帶兵員弁中擇其尤爲得力者酌量選帶數員一同前來以資臂指勞崇光業已赴黔晏端書署理督篆責任綦重著懍遵前日寄諭勞崇光移交各件及地方軍務一切事宜妥爲經理毋稍貽誤將此由六百里各諭令知之○譚廷襄奏查南捻李城等及蘭費棍匪往援長城賊圩經德楞額富和在蘭山境內截剿獲勝後臣恐該匪受創竄突當飭令沂州文武隨同各軍實力防剿茲據黃國瑞稟稱十二月十九日長城援賊行至南橋地方

經我軍迎擊槍斃賊目趙開元陣斬馬賊四十餘名生擒十餘名
賊向西北敗竄又據沂州府知府文彬等稟稱十八日都司楊通
廉帶隊將大店匪鋪平毀斬殺首從各匪百餘名生擒十六名十
九日文彬等往攻磊石東西兩圍匪眾迎敵我軍擊斃馬步賊五
六十名餘匪敗入圩內二十日突有大股匪眾約計萬人由西竄
至蘭山文彬等督隊迎擊斃賊二三百名生擒三名訊係泗州南
捻當卽正法旋見另股匪眾竄近西關文彬等回軍截殺該匪合
股向東北竄逸各等情臣查李城等前竄梁邱因黃國瑞圍攻長
城甚緊該匪等糾合往援一敗於德楞額等十七日之戰再敗於
黃國瑞十九日之戰臣以蘭山地面迤南有黃國瑞一軍迤北有
德楞額富和兩軍賊被扼截無慮竄逃乃德楞額等於十七日在
蘭山接仗後回軍嶧縣該匪乘隙奔突直逼沂州郡城因文彬等

嚴守北路卽向東北計圖牽掣官軍該處與莒州沂水接界南可赴青口北可撲青萊大兵果能前截後追尙不至於深入萬一任其竄越爲害不可勝言臣已飛飭蘭山文武派勇速追並飭東北各州縣嚴密堵禦德楞額富和回嶧縣後聞於二十一日仍行出隊前赴蘭山擬攻賊圩近在咫尺應早得信臣又飛咨星速跟追如能得手不惟保全東路卽蘭費亦大有轉機吳棠奏據副都統富和函稱見奉僧格林沁派帶馬隊千名入東追賊十二月初一日已抵徐郡此時計與東軍會合進剿可期得手惟東境幅隄腐聚於邾城縣之長城圩徐家圩蘆塘圩等處偏率民圩接濟糧食圖赴邳南打糧值總兵黃國瑞一軍於十二月初十日馳抵邾城縣重坊地方據該縣知縣周士溥來見面稟初七八等日李城夥黨見在各圩暫住裝旗匪眾尙未到齊等語十一日黃國瑞派參

將張從龍等帶隊往攻徐家賊圩該逆抵死抗拒官軍越溝向圩內拋擲火器兵勇乘勢衝入斬匪一百三十餘名內有擒首李友輝李友珠二名餘匪四散逃遁經參將姚紹修等隊追斬多名生擒幅匪擒匪十一名訊明正法並將賊圩平毀其附近蘆塘徐家橋等圩各有耆老來營稟求投誠黃國瑞以東境匪圩林立正可乘機收撫以孤賊勢當卽允准飭令殺賊自效惟長城賊圩未下臣已飭黃國瑞趕籌攻拔以便卽卽進剿與同知奎芳等隊合力兜擊至宿州官軍進攻孫疇賊圩有著名悍擒夏廣懋等盤踞孫疇以南之鍾陽集圩乘間運糧接濟孫疇踞匪總兵黃開榜於十二月初四日密派副將歐玉標帶同練總朱廷芳等隊夜襲鍾陽賊圩各隊越濠登牆拋擲火器一齊擁入該逆短兵抗拒歐玉標手刃數賊我軍奮勇接仗斃賊無數生擒逆首吳連芳等多名擒

首夏廣懇夏廣元夏廣才夏四元陳四虎及僞軍師陳姓等率匪百餘潰圍逃遁歐玉標復帶各軍乘勝追及盡數擒獲當將賊圩焚毀黃開榜卽將獲匪夏廣元等訊明正法夏廣懇一犯向係著名擒首已由黃開榜稟候僧格林沁覈辦見仍飭黃開榜籌攻孫瞳老巢以冀迅掃逆氛 上諭山東幅匪麇聚郟城縣境之長城徐家盧塘等圩李城夥黨在各圩暫住裝旗經黃國瑞派參將張從龍等攻破徐家賊圩見攻長城賊圩未下著譚廷襄吳棠飭令黃國瑞迅籌攻拔以便節節進剿與沂州同知奎芳等隊聯絡一氣投誠之盧塘徐家橋孤宅等圩並著妥爲安插毋令再生反側黃開榜將鍾陽賊圩焚毀孫瞳匪勢已孤著吳棠飭令黃開榜直搗孫瞳老巢以期迅殲醜類黃開榜等追剿李城股匪撤隊情形是否張得魁等擅回宿營抑係黃開榜無故調回著吳棠於查明

後據實奏參正在寄諭閒據譚廷襄奏捻棍各匪被勦竄向東北
見飭追擊並張錫珠竄擾臨清等處各摺片蘭山地面南有黃國
瑞一軍北有德楞額富和兩軍該匪本日已無路可竄乃德楞額
等忽折回嶧縣以致該匪乘隙奔突直偪沂州郡城該革員等貽
誤事機實堪痛恨德楞額富和貝仍前赴蘭山著譚廷襄飭令趕
緊進攻儘再遷延不進必治德楞額等以應得之罪竄回山東之
匪是否係張錫珠一股蔓延抑係另股託名著譚廷襄查明具奏
又據文煜奏宋懷詩見願投營殺賊立功請給假十日回家卽行
來營等語著譚廷襄於宋懷詩回東後妥爲駕馭毋令投入匪股
再生事端山東賊勢充斥間敬銘到任尙需時日譚廷襄務當飭
督各軍認真勦辦儘因循貽誤坐失機宜則文煜等可爲前車之
鑒懷之莘縣另股匪徒是否卽張玉懷等潛行竄往抑與該處另

股之匪相爲句串著譚廷襄卽飭常存等趕緊殲除並將賊情據實查奏毋許稍涉欺飾其館陶河口仍飭所屬嚴行防範將此由六百里各諭令知之○調劉長佑爲直隸總督未到任前以兵部左侍郎崇厚暫署以晏端書署兩廣總督○調王榕吉爲直隸按察使以鍾秀爲山西按察使

出山東監運使遷

○免江南湖灘地畝積欠

租息○命署直隸提督寶山接辦直東交界軍務○乙巳以裕祭

太廟 上前期親詣行禮○以戶部右侍郎董恂署辦理三口

通商事務大臣○丙午諭議政王軍機大臣等崇厚奏馳抵景州籌辦大概情形並查辦王恩第各摺片景州故城一帶既有李同文等勇練巡防所有春麟統帶馬步兵八百餘名卽著該署督帶同前往以厚兵力宋憬詩屢降屢叛狼子野心因此時兵力不敷分布暫事羈縻昨據文煜奏稱情願投營恐不足恃該署督旣經

擬令徐廷楷相機辦理卽著責成該鎮確探蹤迹妥速籌辦王恩
第通賊情形該署督旣稱事皆有因卽著嚴訊確情按律懲辦所
帶兵勇分別嚴加管束免致滋生事端遮克敦布被參各款並李
鴻垣把持營務欺蒙各節均著確切查明據實覆奏將此由五百
里諭令知之○諭都興阿奏查明九洲等處情形並各路軍情
分別水陸防剿一摺九洲洲地處險要賊匪拒守甚密當此冬令
水涸之時合和如未克復水陸均難進剿李世忠旣尙肯出力仍
著責成該提督防剿前據李鴻章奏稱克復福山要口江勝海乘
勢砍殺小頭目數十名是江勝海頗知順逆此次都興阿奏稱擬
派總兵李起高乘勝進圖江陰而副將魏麟彪等行至謝家橋遇
賊鏖戰之際忽見已投誠之卡牆突插黃旗心知有變隨戰隨退
探聞江勝海已在謝家橋復投入蘇逆股內等語福山海口與上

海聲勢隔絕原難保其毫無反覆第江勝海纔殺賊投誠何以忽又投入賊內是否江勝海性情反覆確有其事抑係魏麟彪等憚於攻勦隨意捏報李鴻章已派鞠耀乾駛泊徐六涇口該處是否仍爲賊踞著都興阿富明阿李鴻章查明分晰具奏都興阿稱江陰添賊甚重此股逆匪從何處調來該將軍旣飭吳全美派撥師船下駛劉成忠步隊駐紮靖江泰興一帶著卽飭令實力扼堵毋任逆蹤偷渡上游官軍連獲勝仗逆匪大半退踞和州則含巢諒已克復此股逆匪勢必仍回江南但恐侵軼揚防都興阿等尤當隨時畱意皖北連日戰勝各情著會國藩詳細具奏以慰廑念將此由六百里諭令知之○丁未李鴻章奏據藩司會國荃稟稱胞弟曾貞幹於咸豐三年以諸生隨兄會國藩募勇三百人擊賊常甯之洋崗咸豐八年因兄會國華殉難三河慨然有殺賊復仇之

志前湖北巡撫胡林翼委募湘勇千人赴鄂防剿十年克復太湖
縣城嗣圍攻安慶漸次統帶至五千人屢次擊敗援賊克復安慶
省城江北各城多爲賊踞該員駐守樅陽鎮以固皖東門戶同治
元年隨國荃大營肅清江北各城進克繁昌蕪湖等縣遂圍金陵
該員獨當江東橋一路七八月間病瘧醫治甫愈適忠逆李秀城
等率賊數十萬赴援金陵時國荃駐雨花臺當金陵東路該員當
西路力保餉道兼援東路之急苦守力戰四十餘日十月擊退大
股援賊該員與福建提督楊岳斌進攻九洑洲賊壘感受風寒舊
疾復發以十月十八日卒於江東橋營次等情前來臣查補用知
府曾貞幹治軍有律尤善拊循戰士人樂爲用履危蹈險堅固不
搖賊大股赴援金陵謀絕官軍餉道該員從容布置戰守兼施使
賊卒不得逞以去先後克復安慶蕪湖各城及解金陵賊圍實該

員之力居多而在軍中日久勞苦憂思該員精氣亦已竭矣又逆
揣金陵之賊勢必北渡解圍四日卽與楊岳斌冒風雨乘舟上下
謀攻九洑洲以遏竄路茲在軍營病故其生前功績之盛與所以
積勞致疾之由迥非尋常將士可比臣不敢任其湮沒可否仰邀
諭旨准照二品例議卹並請賜諡於本籍及死事地方建立專祠
仍宣付史館立傳出自逾格 天恩 上諭內閣前據曾國藩奏
知府曾貞幹積勞病故當經降旨追贈按察使銜照按察使軍營
立功後病故例議卹茲據李鴻章奏報曾貞幹力疾督戰情形並
臚陳生前戰績懇請逾格優卹已故知府曾貞幹隨同伊兄曾國
藩等從事戎行咸豐十年克復太湖縣城十一年克復安慶省城
本年肅清江北各城進圍金陵皆曾貞幹之力居多七八月閒大
股援賊圍撲雨花臺大營該故員力戰苦守四十餘日使賊卒不

得遲被創遁去乃因在軍日久勞苦憂思遂致一病不起以死勤
事實屬可嘉可憫曾貞幹著加恩照二品例議卹並准其子諡於
本籍及死事地方建立專祠仍宣付史館特予立傳以昭忠蓋○
諭議政王軍機大臣等瑛棨奏髮逆聚攻興安府鎮兩城曹逆竄
入甯陝廳境逼近省垣一摺陝省回匪兇熾未戢若有髮捻各匪
竄入腹地省垣兵力無多設有疏虞大局何堪設想多隆阿進攻
王閣村等處回巢一時尙難得手自應先其所急著卽酌度機宜
或親率將領馳赴子午峪一帶截擊曹逆馳解興安之圍或酌調
得力兵勇由藍田前進交馬德昭統帶堵截曹逆由甯陝竄走子
午峪之路均由該將軍斟酌辦理當此陝事孔棘多隆阿務須通
籌熟計力拯危局毋得稍涉大意貽誤事機據瑛棨奏省城四面
皆賊每門防兵僅千餘名尙覺單薄並著多隆阿妥籌兼顧以副

委任前因髮逆竄偏平利節經諭令官文嚴樹森督飭梁作楫等越境截剿何以該逆圍撲興安該道員等並未派一旅之師前去援應實屬不知緩急前此髮逆竄入楚境官文嚴樹森屢次歸咎豫省以鄰爲壑豈可自蹈鄭元善覆轍著卽嚴飭梁作楫等迅卽督率楚師繞出賊前遏其北竄一面會合興安見有兵勇力解城圍毋得稍分畛域致干重譴川省東北兩路業已肅清該省兵力有餘足敷調撥著駱秉章速派知兵大員移得勝之師馳赴漢中一帶將曹逆股匪剋日殲除毋許遲誤瑛棨另片奏涇陽縣城初經收復四圍賊卡林立等語著多隆阿速飭雷正綰相機剿洗正在寄諭間據多隆阿奏遵查毛震壽辦理陝南軍務雖日久無功尙可敷衍不至蔓延爲害所有該藩司被參各款請暫緩查辦等語多隆阿因毛震壽見在帶兵必須遴派得力大員前往接替方

可一一確查自係爲慎重軍務起見第當此賊氛甚熾漢南軍情
倍形喫重仍著多隆阿嚴密訪查如毛震壽委實不能得力卽派
員接統其眾一面將該藩司撤任查辦毋稍姑容致滋貽誤將此
由六百里加緊各諭令知之○諭耆齡奏賊援湯溪迎剿獲勝及
催調水陸援師進攻臺灣各摺片湯溪逆匪久已窮蹙知府康國
器率部攻剿雖因援賊眾多而曠日持久最爾小城尙未攻拔其
剿辦未能得力已可概見且聞有縱勇滋擾各情見在該督添募
南康勇三千名前往助剿卽著嚴飭在事員弁迅速攻拔毋再遷
延臺灣軍情自斗六失陷賊勢愈熾在事將弁甚可痛恨金廈銅
山征兵旣已抵臺吳鴻源等所部豈可任意逗畱著耆齡徐宗幹
嚴催該副將等卽日渡臺將斗六先圖克復以解郡城之急再行
節節進剿毋得徒託空言日久無成必將在事員弁從嚴懲辦恐

該督撫不能當此重咎也將此由六百里各諭令知之○李鴻章奏據遊擊周興隆稟稱僞忠王李秀城糾合蘇嘉各股攻撲常熟初二日永昌練董馬安瀾率眾迎擊獲勝初六日援賊大至道員徐佩瑗團勇先潰賊直逼常熟城下江陰無錫各處踞賊亦分路來撲勢甚危急等語臣軍分紮前敵昆山太倉之賊復出隊牽掣中隔百數十里無路往援不得已檄調松江常勝軍應遣回甯波之勇五百名配齊炸礮藥彈等件乘坐輪船於十六日由松江啟行駛往福山進口援剿常熟臣另派都司張國瑛等隨隊照料仍歸周興隆節制以資鈐束臣聞常昭城外營卡布置尙嚴米糧資財積蓄頗富駱國忠等倒戈投誠既已與賊爲仇似無輕棄復叛之理惟降眾心志不一固守日久恐生內變該降將與周興隆知臣軍難分皆乞酌派礮隊往助得此常勝軍五百人前去如果賊

勢尙鬆該軍能開道入城庶耳目一新士氣百倍或可併力固守以待太倉之復與

臣軍相聯絡

臣一面派令總兵程學啟郭松林

知縣李鶴章冒雨拔營進紮外關葛隆一帶圖攻太倉並飭蘇松

太道吳煦商調畱守松江常勝軍剋日會攻以分賊勢

上諭李

鴻章等奏法國勒伯勒東礮傷陣亡請旨優卹並暫派達耳第福

接統甯軍及派常勝軍赴常昭協守各摺片勒伯勒東以外國兵

官權受中國職任效命盡忠自應優予恩卹著俟開正後降旨宣

示達耳第福暫行接統甯防李鴻章務當隨時察看如有滋擾各

情卽行撤革以防流弊常昭與上海聲息隔絕恐其日久生變李

鴻章見派常勝軍五百人前往助守尙爲妥協惟太倉未復則道

多隔閡該撫見派程學啟等進紮卽著迅調常勝軍剋日會攻以

分賊勢惟該撫所奏各情與都興阿昨日所奏歧異恐係魏麟彪

等並未前往任意捏報都興阿未及詳查據以入告著李鴻章迅速查明據實具奏毋稍徇隱將此由四百里諭令知之○是月豁免四川榮昌等五縣被擾額賦倉穀蠲免福建甌甯等十縣暨峽陽等三縣丞所屬被擾新舊額賦蠲緩湖南澧州等十州縣暨岳州衛被水新舊額賦蘆課河南許州等八十六州廳縣被旱被水被擾新舊額賦展緩湖北沔陽等二十州縣暨武昌衛被水新舊額賦甯古塔三姓歉收帶徵銀穀○是歲朝鮮琉球入貢○會計天下民穀數除江蘇安徽福建雲南廣西浙江陝西未經冊報外直隸等省通共大小男婦二萬五千五百四十一萬七千三百二十四名口存倉米穀三百九十七萬七千六百一十五石二斗九升六勺